

Engulhu Yowene Ya Kristo

Ngoko yikakangiriribawa omo
kyiinywa kya Nyamuhanga
Omo by'eryigha 13

Byahandikawa

J.C. Choate

Byamabindulhwa omo Lhukonzo
na

Taliwabo Ezekiel Bwambale,
Sikulimba Sedrack
Taliwabo Rabson

Kasese Town Church of Christ
P.O. Box 305
Kasese - Uganda

Published by
World Literature Publications
Winona, MS,

Emithwe y'ebberyigha

Ekyeryigha 1: Engulhu Ya Kristo.....	4
Eky'eryigha 2: Ebikulhu-bikulhu omo Ngulhu mbuya	11
Eky'eryigha 3: Eribirikirwa N'engulhu Yowene.....	17
Eky'eryigha 4: Eryolhobera Engulhu Yowene.....	24
Eky'eryigha 5: Eryowa Engulhu Yowene.....	30
Eky'eryigha 6: Erikirirya Omwa Nyamuhanga.....	37
Eky'eryigha 7: Eribindulha Omuthima Erireka Ebibi.....	44
Eky'eryigha 8: Erikangya Yesu embere sy'abandu.....	51
Eky'eryigha 9: Eribatiisiibwa n'erisangulhwa kw'ebibi.....	57
Eky'eryigha 10: Emighisa y'engulhu Yowene.....	64
Eky'eryigha 11: Erithuulha Engulhu Yowene.....	71
Eky'eryigha 12: Erithuulha Esindi Ngulhu.....	78
Eky'eryigha 13: Erikakirya Engulhu.....	85

Eby'eritsuukirako

Omuthwe mukulhu w'ekitabu kyino niwa muthambo munene. Bibilia yikakangiriraya yithi, hali Engulhu Yokwenene nguma, niikwa ebisomo bikaghana n'arikangirirya bithi hali esyongulhu thethethe. Busana n'omwatsi oyu, litholere ithwigha oko ngulhu eyi kakangiririibawa omo masako thwangigha okwenene n'eriyyetheya oko mabehi.

Engulhu eyikakangiriribawa omo by'eryigha ebi, yikalhuua omo kyiinywa kya Nyamuhanga. Yikimanira omwatsi mubuya now'ebitsange. Alyathya kusangwa akakanganaya ngoko Kristo mwaholha, mwatsikwa kandi mwalhubukiibwa, angathokesya abandu eryolhobera ekyihano ekyikahamba oko Ngulhu Yowene, abandu bangalhama oko kyibi kandi busana namaha aw'engebe iy'erikotha.

Thuli omo mughulhu hali Engulhu Nyibi, erikangirirya ly'amabehi, n'eritsandya lingyi. Ekyi kyikatsemesaya omundu eriminya ngoko omulhamo akineho omo mughulhu ono.

Ghukatholera erisoma eby'eryigha ebi, ighunawithe obwagha by'eriminya erisonda lya Nyamuhanga. Ghusome amasako awendaghano Nyihya-nyihya, iwathoka eriminya ngoko ebisakire omo kitabu kyino, niby'okwenene. Ulebaye obuli kyiinywa ngakinasosire ebisakangire omo Ndaghano Nyihya-nyihya. Ukendibya wabirirebya ndeke, ukendibana okwene okulimo. Thukakusaba thuthi, iwikiriry'ako kandi n'eryolhober'ako. Wamabirikolha uthya, iwathoka erikangirirya Engulhu Yowene oko bandi bandu.

Eky'eryigha 1

Engulhu Yowene Ya Kristo

Thukasoma oko mwatsi ow'Engulhu Yowene omo masako aw'endaghano Nyihya-nyihya, ngendo nyingyi. Thukowa n'abandi ibanimukania kugho. Thukaminyisaya omwatsi oyu omo nzira nene. Engulhu Yowene nikyi? Engulhu Yowene ya Krsito ni yahi? Leka thusukule amasako erisubwamo. Paulo akahandika athi, *“Kusangwa amasako athi, Obuli mundu oyukamwikiriraya syendisayahemulhwa. Sihali erisombolha busana n'abandu bosu, kutse Omuyuda, kutse omunya bihanda. Kusangwa Nyamuhanga ni Mukama w'abandu bosu, kandi akatsumulha ndeke abosi abakamulakira. Kusangwa kithi, obuli mundu oyukalakira erina ly'Omukama asyalhamiibwa. Neryo basyamulakira bathi oyo bathikiriraya kwehi? Kandi basyikirirya bathi oyo bate bathow'a ko mwatsi kwehi? Kandi basyowa bathi, omwatsi amathandithulwa kwehi? Ngoko kisakire kithi, Ni kyibuya ndeke eryowa erihika ly'abandu bakalettha Engulhu Mbuya”* (Baroma 10:11-15). Omwatsi omukulhu ali athi, ekyiinywa “Engulhu Yowene” kyikaminyiisaya omwatsi mubuya, omwatsi owakatsemesaya, omulhamo, okwenene, ekyiinywa, erilhagha, n'amaha. Omwatsi oyu ni w'engabane oko yindi myatsi kusangwa akahamba oko Ngulhu Mbuya ya Krsito.

Engulhu Yowene eyi kandi yikahamba oko Lhuholho, Erithabwa, nerilhubukiibwa Iya Yesu Kristo. Omukwenda Paulo mwahandikira Abanya Korinto athi: *“Neryo balikyetu ngabamiinyiisaya Engulhu Yowene eyo bathulira. Nenyu*

mumwangirirayo, kandi muhangane muyo mo ndeke. Kandi mukalamiibawa omo Ngulhu Yowene eyo nabakangiriraya, mwamasika muyo mo ndeke, mwamabya mutalikiriraya busa. Kusangwa natsuka eribaha erimbere omwatsi munene ogo nangirira nibya, nyiti Kristo wahola busana nebibi byetu ngoko kisakire omo masako, Kandi Yesu mwatabwa, neryo mwalubukibwa enyuma webiro bisatu ngoko kisakire omo masako” (1 Abanya Korinto 15:1-4).

Neryo, oyu akabya mwatsi mubuya athi? Kusangwa erilaba omo lhuholho, eritsikwa, n’erilhubuka Iya Kristo, omundu akathunga erilama kandi iniathunga n’amaha a’werisyabyaho kera na kera. Omusakangyi iyano muguma akatasyabuugha athi: *“Kandi sinyikwire esisoni busana n’Engulhu Yowene, kusangwa ni butoki bwa Nyamuhanga, obukalamaya obuli mundu oyukikiriraya, eritsuka oko Bayuda, nakandi oko bandu bebindi bihanda nibya. Kusangwa Engulhu Yowene ikatubisulira ngoko Nyamuhanga akatungananya omundu embere siwe, omwikirirya lisa, ngoko kyisakire kithi, “Niikwa oyukatunganana embere sya Nyamuhanga busana nerikirirya asyakothe.” (Baroma 1:16-17).*

Thunasi omwatsi mubuya ngakamanyisaya bihi omo ngebe syethu sy’obuli kyiro. Thwamathunga emigisa, thukatsema kandi ithwanza nabandi baminye kuyo. Kino nikyobuhangwa. Lithya kubitolere bithya busana n’omwatsi w’omulhamu owakalhwa okwa Kristo. Thwamabya ithwabirikirirya Kristo kandi ithwabirilhama erilhaba omo lhukogo lhwawe, thukatholera ithwanza eribwira ekihugho oko mwatsi oyo. Ekyi kyireka Kristo inya buugha, *“Muye omo kihugho kyosi, mutulaganaye Engulhu Yowene oko bandu bosi. Oyukikiriraya*

kandi iniabiribtisibwa asyalamibwa; Niikwa oyutikiriraya asyasingwa” (Mariko 16: 15-16).

Amasako kandi akakanaya oko Ngulhu ya Nyamuhanga. Thukasoma, *“Ingye Paulo, omugombe wa Kristo Yesu, n’omukwenda oyo Nyamuhanga abirikira n’erimusombolha busana n’Engulhu Yowene yiwe. Engulhu Yowene eyi Nyamuhanga alagayo erimbere omo muno wa’baminyereri buwe, kandi isakire omo masako abuyirire. Engulhu Yowene eyi ni y’Omugala wuwe, omukama wetu Yesu Kristo. Naye abuthawa ng’omundu omo lhubutho lhwa Dawidi. Niikwa omo bwa Nyamuhanga buwe bubuyirire, erilubuka liwe oko baholi likakangaya omo butoki bunene, Yesu kwali mugala wa Nyamuhanga . busana na Kristo, twabirihabwa olukogo, kandi twabirihirwa mo bakwenda biwe , erisondolha abandu bebihanda byosi erimwikirirya nerimukenga. Nenyu nibya inywe muli eRoma, Nyamuhanga abiribabirikira eribya bandu ba Yesu Kristo. Neryo ngabasakira inywe abe Roma abo Nyamuhanga abiryanza neribabirikira eribya bana buwe. Nyamuhanga Tata wetu, n’Omukama Yesu Kristo, abahe olukogo n’obuholo” (Baroma 1:1-7).*

Omo nzira nguma, omusakangi yan’omuguma, akakanaya oko ngulhu yolukogo lwa Nyamuhanga: *“Niikwa ngaganza engebe yaghe nga si kindu, inyatoka eribuugha obukwenda bwaghe, n’omubiiri ogo Mukama Yesu amba erikola, eryo ni thuula Engulhu Yowene yolukogo lwa Nyamuhanga” (Emibiri y’Abakwenda 20:2).*

Emilhondo eyi yikakangaya obuguma obuliho ahakathi-kathi

ka Nyamuhanga na Kristo. Nyamuhanga yowathuma Kristo eriha Engulhu oko kihugho. Omo nzira eyi, yanginahulhwamo Engulhu ya Nyamuhanga kutse Engulhu ya Kristo. Kandi thukasoma oko Ngulhu ey'olhukengerwa. Towa: *“Erikangirirya eri likabanika omo Ngulhu Yowene eyo Nyamuhanga amba erithulhayo, kandi ikalhuua oko Nyamuhanga w'olhukengerwa now'omuyisa”* (1 Timoteo 1:11). Kandi athi *“Kandi Engulhu Yowene yethu y'amabya ibisamire, ikabisama busana n'abandu abakahera, sibalikiriraya kusangwa nyamuhanga mubi w'ekyihugho kino abiririba ameso w'obulengekania bwabo athi sibalhangire ekyakakala ky'Engulhu Yowene ey'olhukengerwa lhwa Kristo, oyuli kisosekanio kya Nyamuhanga”* (2 Korinto 4: 3-4). Engulhu Yowene ni y'olhukengerwa, ekikamanyisaya indi yalwa elubula, niy'erikota, kusangwa ikalwa oko Nyamuhanga na Kristo.

Omo kytibu kya Matayo, Mariko, Luka na Yoane, yikahulawamo Engulhu y'obwami mgendo nene. *“Kandi Yesu mwalendera omo miyi yosi noko hiyi hyosi, iniakakangiriraya omo manyumba wabo werihindanamo, neritulagania Engulhu Yowene y'obwami, nerilhamya obuli musindo w'endwara n'obuli musindo w'obukoni”* (Matayo 9:35). *“Neryo Yoane abere abibirwa omo muliki, Yesu mwaya eGalilaya, mwatulagania Engulhu Yowene eyikalhua ewa Nyamuhanga. Athi, omugulu abiribererera, n'Obwami bwa Nyamuhanga buli hakuuhi! Mubinduke, erireka ebibi byenyu, mwikiriraye Engulhu Yowene”* (Mariko 1:14,15). Omo mugulhu oyo, Kristo na Bandi bandu, mubathuulha Engulhu Yowene eyo bwami obwa hakuuhi n'erihika. Omo bindi biinywa, obwami bwabya isibulibwatsuuka, niikwa bwabya hakuuhi n'eritsuka. Liriryo,

Engulhu Yowene muyathuulhwa, erikwamana n'oluholho lh'omukama, eritsikwa n'erilhuubukiibwa. Abo abikiriraya erilhaghira eryo, mubalhamiibwa kandi mubathomekerwa oko Kanisa ya Kristo kutse Obwami (Emibiri Yabakwenda 2). Neryo kandi thukasoma oko Ngulhu y'Omulhamu. Omukwenda akabya akakania na bakristo abe Efeso, akabuugha atya: *“Omwatsi kwabya atya busana nenyu. Omugulu mowa omwatsi, w'ekwenene, w'Engulhu Yowene yeribalama omwikirirya Kristo. Iye Nyamuhanga mwabahirako ekiminyikalho kyiwe, iniakabaha omulimu abuyirire ogo alaga”* (Abanya Efeso 1:13). Busana nekyo, Engulhu Yowene y'eyikaletha omulhamu. Eyindi mighulhu thukabuugha oko mwatsi ow'endekatheka ey'omulhamo, ini nzira erithonda endeka-theka ya Nyamuhanga busana n'erilhama. Kandi, thunawithe Engulhu Y'obuholho. Twamasoma Abanya Roma 10:15, omusakangi akabuugha athya: *“Ngoko kisakire kithi, Ni kibuya ndeke eriowa erihika ly'abandu bakaleta Engulhu nyibuya!”* (Abanya Efeso 6: 14-16, yikabuugha yithi, *“Neryo Muhangane, musiike, muhire omwatsi w'ekwenene ng'omukoba omo mbindi syenyu. Mwambale erithunganene ng'ekindu kyamalhwa ekikathegaya ekikuba. Kandi mwambale ebiryatho by'Engulhu Yowene y'obuholho. Kandi oko mighulhu yosi muhambe engabo yerikirirya erikatoka eririmya emisoha yosi y'omuliro y'omubi.”* Engulhu yikaletha obuholho-obuholho obo bulengekana, obuholho bw'ekyirimu, obuholho hayiima n'abalikyethu. Kristo abya mundu w'obuholho kandi engulhu yiwe yikaletha obuholho obwa abya withe haghuma na Nyamuhanga. Kwenene oyo ni mwatsi mubuya. Eky'erighunzerera, thuwithe engulhu y'amaha. *“Erimbere inywe mwabya hali oko Nyamuhanga imwabiriyiyira mo*

Nzighu syiwe omo bulengekania bwenyu busana nemyatsi mibi mwabya mukakolha. Niikwa lino Nyamuhanga abiribasangania okwiye omo luholo lwomubiri wa Yesu , iniatoka eribaleta embere sya Nyamuhanga imune babuyirire nababuya, butsira ekyiinywa ekyangabahandikirira. Niikwa litolere imwakwama butsira eriregula omwikirirya, imunasikire ndeke. Simutundawe mukaleka amaha w'Engulhu Yowene eyo mowa. Ingye Paulo nabiribya mugombe w'Engulhu Yowene eyi, eyikakangiribawa oko bandu bosu muna-kyihugho.” (Kolosai 1:21-23). Omundu akathunga amaha w'engebe yerikotha erilhaba omw'olhobera Engulhu. Ekyi kye ky'omuhandiki akaminyisaya. Amaha syangabanika omo yindi nzira.

Omukwenda Paulo akikalha anyanemubuugha oko mwatsi wa “Engulhu yaghe” kutse “Engulhu yethu”. Akabya inyakamiinyiisaya kyi? Akabya inyakamiinyiisaya Engulhu eyo iya n'abandi bathunga uko Mwami Mukulhu busana nerithuulirayo abandi bandu. Busana nomwatsi oyu, akabuugha atya: “*Neryo mothwabalethera Engulhu Yowene, butsira omubinywa bisa, niikwa omo maka, nomo Mulimu Abuyirire, nerisingana lyo mwatsi wekwenene. Munasi emikolere yethu omo kathikathi kenyu; ngoko twakola busana neribawathikya*” (Abanya Tesalonika 1: 5). Ngoko kyamabiribuuwa hano, kandi omo Banya Roma 1:16: Engulhu yiri nobuthokyi kusangwa yikalhamaya abo abakikiriraya neryoloberayo.

Eyi y'Engulhu omo biinywa bya masako. Yolhobire niikwa yiwithe obuthoki. Engulhu eyi yine ngoko yabya kera kandi niy'emighulhu yosi ngoko Kristo ane. Yikalhamaya, yikaha

amaha. Engulhu ni nguma kandi yitholera iyathuuliirwa ok'obuli mundu. Niya Kristo, Niya Nyamuhanga, kandi niy'olhukengerwa. Yikatsumula, yikaha eribanza ok'omundu, kandi yikaha esya ngwamirwa. Yiriho busana n'omundu mughuma kandi busana n'abangyi. Kwenene, kwekwene ni Ngulhu Yowene.

Ebibuulyo

1. Soma Abanya Roma 10:11-15.
2. Thonda, Engulhu Yowene nikyi?
3. Engulhu yimanire okokyi?
4. Oluholho lhwa Yesu, eritsikwa, n'erilhubuka bikabya bithi mwatsi mubuya?
5. Uhandike ebiinywa ebiri omo Abanya Roma 1:16,17.
6. Thukayowa thuthi thwamowa omwatsi mubuya omu myatsi y'ekyihugho?
7. Yesu mwakangirirya mwatsi wahi omo Mariko 16:15,16?
8. Thwangabuugha thuthi, tuthi Engulhu niya Nyamuhanga?
9. Thonda, Engulhu nga niy'olhukengerwa yithi?
10. Ghaniraya oko mwatsi "w'Engulhu y'obwami"
11. Uhe emilondo eyikahamaya omwatsi oyu.
12. Engulhu yatsuuka erithuulhwa mughulhu wahi?
13. Ekyikaletha omulhamo ni kyahi? Kandi kyithi?
14. Engulhu yikaletha yithi obuholho?
15. Amaha wethu ali omo bihi?
16. Busana nakyi Paulo mwabuugha athi "Engulhu yaghe" kutse "Engulhu yethu"?
17. Engulhu yiwithe buthoki bungahi?
18. Hali ngulhu syowene singahi?

Eky'eryigha 2

Ebikulhu-bikulhu by'omo Ngulhu Yowene

Amasako akakangiriraya ndeke athi Kristo mwaholha, mwatsikwa, neryo mwalhubukiibwa erilhwa omo yisinda. Ebikwamirirene ebi, om'olhughano lwa Yesu by'ebikahulhaw'amo esyambitha sy'Engulhu Yowene. Paulo akakanaya ok'obuli nguma akasakangira abikirirya be Korinto, inyanemukangania obuhugho obuli aha kathi-kathi k'omulhamo wabu n'esyambitha esi: *“Neryo baliikyetu, ngabamiinyiisaya Engulhu Yowene eyo nabatuuliira. Nenyuu momwangirirayo, kandi muhangane muyo mo ndeke. Kandi muukalamiibawa omo Ngulhu Yowene eyo nabakangiiriraya, mwamasiika muyo mo ndeke, mwamabya muutaliikiiriraya in busa. Kusangwa natsuuka eribaha eriimbere omwatsi munene ogo nangirira nibya, nyiti Kristo mwahola busana n'ebibi byetu ngoko kisakiire omo masako. Kandi Yesu mwatabwa, neryo mwaluubuukiibwa enyuma w'ebiro bisatu ngoko kiisakiire omo masako”*, (1 Korinto 15:1-4). N'ibuugha ambu, Engulhu Yowne ya Yesu yiseghemire oko by'ekwenene. Kristo kwathaholha, akatsikwa, neryo akalhubuukiibwa erilhwa omo yisinda, sihangabere Engulhu Yowene, neryo n'omulhamo syangabereho. Niikwa ngoko mwaholha, amatsikwa kandi amalhubukiibwa, neryo thukabana omusingyi w'erilhubuka, nokweryo ekyi kyabiribindulha ekyihugho.

Lithya thukubungule esyanungu ngulhu-ngulhu esy'Engulhu

Yowene, neryo omundu angathoka erisamalira ebyo bithuwithire:

1. Olhuholho Ihwa Kristo

Biblia yikabuugha iyinemusubirir’amo yithi Kristo mwaholha. Niikwa hulikirira ekyiinywa kya Nyamuhanga ekyokyene-kyene: “*Muby n’obuulengekania obu bwa Kristo Yesu, oyuu, nomo anabya Nyamuhanga kwenene, mwatayilwira eriringirirana na Nyamuhanga. Niikwa mwayiituutuula olukengerwa luwe, mwayiyira ng’omugombe, mwabutwa ng’abundu, mwaminyikala omo kiisosekano ky’omundu. Neryo mwayiikehya, mwabya akowa, eriihiika oko luholo, loluholo lw’omusalaba.*” (Fiiliipi 2:5-8). “*Niikwa tukalangira Yesu, oyo wayirawa mo muke oko bamalaika busana n’akatambii kake, iniatoka omo lukogo lwa Nyamuhanga erihola busana n’abandu bosii. Neryo Yesu busana n’eriagalwa liwe ly’oluholo, abiribana olukengerwa n’eriisiikya ly’omwami*”. (Hebrania 2:9).

Yesu aholera ndi? Aholera obuli mundu ngoko thwabiriminya omo omo Hebrania 2:9. Amasako nagho akathubwira athi aholera ababiihya. Hulikirira: “*Niikwa Nyamuhanga akakangaya olwanzo luwe busana netu, kusangwa omugulu twabya tukine bakola-nabi, Kristo mwatuholera.*” (Baroma 5:8). Niikwa busana nakyi mwaholera ababiihya? Erithubanira omulhamo n’amaha. Thukasoma: “*oyo wanziire abandu bosii balamibawe, n’iriminya ndeke omwatsi w’ekwenene*”. (1 Timoteo 2:4). “*Niikwa omukama sialiamala busana n’erilaga liwe ng’abandi ko bakagganiiraya. Niikwa akayitsingira busana nenyuu, isiianziire omundu n’omuguma akahera, niikwa anziire*

abandu bosii ibabindula emithima yabo n'ireka ebibi". (2 Petero 3:9). Ekyo kyikaminyiisaya kyithi omundu mulebe mwaholera iwe naghe. Thaghanirya kukyo. Nomothwanabya babiihya, kandi nzighu sya Nyamuhanga, kandi isithutholere olhukogho n'olhukeri, niikwa, Kristo mwanza erilhwa elhubulha amasa oko kyihugho kyino eky'ekyibi n'obuuliighe n'eriholha oko musalaba imothwalhama n'erithunga amaha w'engebe y'erikolha. (Baroma 5:6,7). Ni ky'eriswekerya. Thalengekania, mwaholera ekyihugho kyosi – muligholho, munabwire, n'omungya. Thukatholera ithwasweka, neryo thukatholera ithwalhuusyamo obw'owa n'obuyiketherwa embere syiwe. Thwangathoka thuthi erikolha kyike okw'aho?

2. Amatsiko wa Kristo

Kristo abere abiriholera oko musalaba, ebisakire bikabuugha bithi, "Neryo bwabere bwabya igolo-golo, omundu w'ebindu mwasa Omunya Arimatea, eriina liwe iyo Yosefu, naye abya mwiga wa Yesu nibya. Omundu oyo mwasa uku pilato, mwasaba omubiri wa Yesu. Neryo pilato mwahamula Yosefu ahabawego. Neryo Yosefu mwiimya omubiiri wa Yesu, mwaliingiira kugo k'olukimba lowene lw'ekiitani. Neryo mwahiirago omw'isinda yiwe nyihya-nyihya eyo abatsa omw'ibwe. Kandi Yosefu mwakuumbagaliirya, eribwe riinene oko luukyo lw'eyisinda, neryo mwaluuaho. Mariia Magdalene, n'ogundi Maria ababiri bosii babya biikere eyisirya okw'isinda. (Matayo 27:57-61). Omo nzira nene, sihali ngabane nene ahakathikathi k'amatsiko wa Kristo, kwilhabirirya omo mughulhu oyo. Abandu bakaholha ob'uli kyiro neryo ibatsikwa. Ekyi nikya kwenene omo kyihugho ekyosi kandi kyikabyaho

erilhwa aho ekyihugho kyikahangikirwa. Niikwa omukama abya inyabirilhaga athi asyabya amaholha neryo akatsikwa, akendisyalhuubuuka. Mwabuugha, “*Muhiimbule eHekalhu eyi, naghe nasyahanganiayo omo biro bisathu*” (Yoane 2:19). Ni kwenene mubathaminya eby’akabuugha endambi eyo, niikwa kubasangwa imubaminya, bangamwikirirye? Ekyabya kyabere ahakathi-kathi k’obuholho lhwawe n’eritsikwa liwe ni kayhi? Abakwenda bakabya ngababya ibabiribya omw’ikukubalha, bakayowa ebyosi nga byamahweraho. Neryo muhabya kyi? Yesu mwasa ngoko asangawa inyabiribalhaga.

3. Erilhubuukiibwa lya Kristo

Kristo kwaholera oko musalaba neryo akabya omo yisinda, ekyihugho kyangamwibirirwe, mbino hangabya erimwibuka ng’omubehi. Kwaholha neryo akabya omo yisinda, bangabuughire bathi syakiriho nga ghundi mundu ghosi. Yesu abya wa ngabane. Abya mughalha wa Nyamuhanga. Mwabuugha athi akendisyalhuubuuka erilhwa omw’isinda, ekyo mwakolha kyo. (Matayo 28). Busana n’erilhuubuukiibwa liwe, hali omulhamo, amaha ngoko abosi bakendisyalhuubuuka, kandi n’amaha w’engebe y’erikotha.

Thuthe thwaghenda embere, thulebaye amasako ekyakabuugha okw’ilhuubuuka ly’omukama “Niikwa omo bwa Nyamuhanga bwiwe bubuyirire erilhuka liwe oko luholho likakangaya omo buthokyi bunene, Yesu kwali Mughalha wa Nyamuhanga” (Baroma 1:4). “*Ekyighuma kyanzire nyithi, nyiminye Kristo kwenene, n’obuthokyi obw’erilhubuka, kandi nyisangire omo magali wiwe, n’eribya haghuma naye omo*

lhuholho lwiwe” (Filipi 3:10). “Thupipe Nyamuhanga iyo Thatha w’omukama wethu Yesu Kristo! Busana n’erighanyira liwe erinene, abiriswa-thubutha kandi n’erithuha engebe eyiri n’amaha busana n’erilhuubuuka lya Yesu Kristo omo baholi” (1 Petero 1:3). “Omwatsi oyu nikisosekanio ky’olhubatiso busana n’erilhama lyenyu. Eribatisya s’ilhuusya ly’emithuundi y’oko mubiri, niikwa n’ilhagha Nyamuhanga omo bunyamuthima buwene, erilhamiibwa busana n’erilhubuka lya Yesu Keristo” (1 Petero 3:21). “Thunasi Kristo abirilhubukiibwa oko baholi isyendisyaolha na kera; olhuholho silhukyimuwitheko hamuuli” (Baroma 6:9). “Kusangwa Kristo mwaholha neryo mwaswabyaho athoke eribya mukama w’abaholire n’abaliho” (Baroma 14:9).

Ngoko Kristo mwaholha, mwatsikwa, neryo mwalhuubuukiibwa erilhwa omo yisinda, lithya ni Mukama wethu kandi Mulhamya ethu. Akathabalha oko kuboko kw’amali kwa Nyamuhanga (Emiibiiri 2), kandi abirithulhagha erisyasubulha (Yoane 14:1-3).

Omo lhuholho lhwa Yesu, omusasi wiwe mwuthika abandu imubabana erisangulhwa kw’ebibi (Matayo 26:28; Efeso 1:7). Ni busana n’obw’owa oko Ngulhu Yowene ya Kristo, omundu akasangana n’omusasi oyo neryo ebibi biwe ibyasangulha (Emiibiiri 2:38; 22-16). Omo by’eryigha eby’ahambere thukendilhangira ndeke-ndeke nghoko ekyi kyikakolhawa.

Wikiriraye, ngendo nguma habw’ebyosi, ghuthi busana n’erilhuubuuka ly’omukama, munabwire Aliho. Ng’abikiriirya biwe abowa, thukatholera ithwabya thuthya kandi

ithwasyangira omo bwami n'eryikalha nayo kera na kera.

Ebiibuulyo

1. Biblia yikakangiriraya kyi oko Yesu?
2. Thonda ebikulhu-bikulhu by' Engulhu Yowene.
3. Busana nakyi bikanibaw'ako bithya?
4. Soma 1 Korinto 15:1-4.
5. Ghaniraya ekyo Engulhu Yowene ya Kristo kyikamiinyisaya.
5. Ghaniraya ekyo Engulhu Yowene ya Kristo kikamiinyisaya.
6. Hereraya emilhondo eyikakanganaya yithi Kristo waholha.
7. Kristo aholera ndi?
8. Busana nakyi Kristo mwaholera ababiihya?
9. Ghaniraya olhuholho lhwa Kristo ngalhukamiinyisaya kyi okwithwe?
10. Thonda olhughano lhw'amatsiko w'omukama.
11. Kristo mwalhagha erikolha kyi, asyabya aholha n'eritsikwa?
12. Abigha mubanakenga endaghamo eyi?
13. Ni mo musindo wahi ow'olhulho lhwa Yesu lhukabyamo lhwa ngabane n'esy'abandi?
14. Omwihuumbuuka lya Kristo mumwalhwa kyi?
15. Thonda emilhondo eyikakanaya okwilhubuka lya Yesu.
16. Kristo akamiinyisaya bihi okwithwe munabwire?
17. Alihi endambi eno?
18. Anemwendisyasa kandi? Kyabya kyithi, ni mugulhu wahi?
19. Ghaniraya omo bikuuhi obukulhu bw'omusasi wa Kristo.

Eky'eryigha 3

Eribirikirwa oko Ngulhu Yowene

Omo bihugho by'ebisomo omughulhu ono muli bulengekania bunene obukabuulhaya Nyamuhanga ngakabirikira omundu yathi busana n'omulhamo. Thukendithonda esyanzira esya ngulhu-ngulhu. Ey'erimbere, hali abo abakabuugha bathi Nyamuhanga akabakaniraya meso oko meso erilhaba omo mulenge omuke. Ow'akabiri, abandi bathi Kristo akabasira erilhaba omo nzoli kutse omwikanganiibwa ibanalholire. Now'akasathu, hali abo abakiikiiriraya bathi omukama akababirikira erilhaba omwikolha ly'omusiindo w'engabane. Lithya omo misindo eyisathu eyi, bakayibwira bathi eyi y'enzira ey'omukama akabalhamiray'amo kutse ey'eribalhabirya omwatsi w'engabane. Niikwa Biblia yikanakangiriraya ebyi? Hano hali erihabulha. Muyikengemerere abo abakabuugha bathi mubakoowa kutse mubakalhangira bindu.

Eky'eriimbere ekyothunakasonda eribulirirya ky'ekyi: Nyamuhanga akanabuugha omo mughulhu ono? Ekyi kyanguhire, thwamasuba omo Hebrania 1:1,2: "Nyamuhanga, "kera mwabuugha n'abathathakulhu bethu omo biinywa by'abaminyereri, esyongendo nyingyi nomo syonzira misindomisindo. Niikwa omo biro ebi eby'enyuma-nyuma abiribuuuga nethu busana n'Omughalha wiwe, niikwa Nyamuhanga mwahangika omo byalha by'omughalha wiwe ekyihugho n'ebiyosi ebiri omo kyanya. Kandi Nyamuhanga abirihira Omughalha wiwe eribya omwenye mwatsi yosi". Erikwamana n'ebi Nyamuahanga akanakanaya ebiro bino kandi akakanaya

omo Mughalha wiwe. Ekyi kyikakanganibawa nomo Matayo 17:5 ok'omughulhu w'erihindukiibwa Iya Kristo. Hulikirira Nyamuhanga: Oyu ni mughalha waghe omwanze, oyongatsemere. Mumwowe!”

Ekyibuulyo ekyindi: Nyamuhanga akanakanaya n'omundu meso oko meso? Ekyi kyisamalirwe ndeke thwamasoma emilhondo: “*Yesu mwakolha ebindi bithiko-thiko embere sy'abigha biwe, ebithasakire omo kytabu ekyi. Niikwa ebi bisakire imwathoka eryikirirya Yesu kwali Kristo, koni Mughalha wa Nyamuhanga, neryo imwikiiriya eri imwabana engebe omo liina liwe*” (Yoane 20:30,31). Lithya, ebi bisakire busana nakyi? Imuthwathoka erikiiriya. Niikwa ebindu ebi bisakire hayi? Omo Ndaghano Nyihya-nyihya. Nokweryo thwamasoma n'eryigha ebirimo ithukendiminya erisonda ly'omukama.

Kandi, thukasoma: “*Erikirirya likasa erilhaba omwihulikirira, neryowa ekyiinywa kya Nyamuhanga*” (Baroma 10:17). Ekyibuulyo: Eryikirirya linakasire omo yindi nzira? Lyamabya irikanasa, amasako syalibuugha athya. Ni kwenene hane abaka buugha bathi okwihulikirira ekyi, erilhangira bathi babiri beghera, n'ebindi. Niikwa, yikakangirirya yithi eryikirirya likasa erilhaba omwihulikirira ekyiinywa kya Nyamuhanga. Niikwa hali Biblia nguma kandi hali erikirirya lighuma (Efeso 4:5).

Kusangwa erikirirya likabanika erilhaba omwihulikirira ekyiinywa kya Nyamuhanga, ekyi kireka ibathukangirirya obukulhu bw'eryigha ekyiinywa kya Nyamuhanga (2 Timoteo 2:15), erisondekania omo masako (Yoane 5:39), n'ebindi.

Omwatsi ali athi, kyireka ihabya erikamathya oko masako iwo wene, ithunemukangania erihamulhwa lyagho n'eriyaughira lyagho (2 Timoteo 3:16,17).

Neryo amasako akathubwira athi amasako abiribikwa omo malegha w'ezahabu. Hulikirira omukwenda Paulo, "*Kundi sithweyiithuulha ghoko, niikwa thukathuulhagho ngoko Kristo Yesu ni Mukama, nethu thuli baghombe benyu busana na Yesu. Kusangwa Nyamuhanga yowabuugha athi, Ekyakakalha kyikoleraye omo mwirima, n'ye abirikolerya omo mithima yethu n'erithuuha ekyaakalha ky'eriminya olhukengerwa lhwa Nyamuhanga olhuli omo buuso bwa Kristo. Niikwa thuwithe obutheke obu omo mubiri w'ekyithaka, neryo obuthokyi bunene obo bubye bwa Nyamuhanga butsira bwethu*" (Korinto 4:5-7).

Akabuugha bihi hano? Akabuugha athi Nyamuhanga abirisombolha abandu, abandu nga Paulo erithwalha Engulhu Yowene oko bandu ngathwe. Thalengekania lithya okwibinduka inene eriri omo Emiibiiri y'Abakwenda. Hereraya eky'erileberyako kyighuma aho Nyamuhanga iyuwene-wene akaniraya omundu y'ekyangakolha imwasyalhama. Siwangakyibana. Eky'erilebery'ako, omo Emiibiiri 8, omulaika w'omukama mwathuma Filipino erikangirirya Filipino yoko Kristo. Ekyibuulyo: busana nakyi omulaika mwathayighenderayo akaleka Filipino ye Samaria erilholya embere akakangirirya abandu bayo? Ni kusangwa Nyamuhanga abya inyabirihira Engulhu Yowene y'omo malegha w'omuthaka n'okweryo kyabya oko mundu erikolya Engulhu Yowene oko mundu munyikiyiwe. Kandi, omo Emiibiiri 9, thukasanga Saulo akabuulya Nyamuhanga y'ekyerikolha busana n'erilhamiibwa

liwe n'omukama akamubwira athi aghende omo Muiy neryo athi eyo yakendibwirwa ekyakatholera erikolha. Linyuuma Anania mwasa erimubwira (Emiibiiri 22:16). Ekyibuulyo: Ekyaleka omukama athamubwira nikyi? Kusangwa siriyabya isonda liwe erikolha athya. Kubiri bithya n'ebyerilhangiriraka bingyi by'eribinduka ebiri omo Kitabu ky'Emiibiiri y'Abakwenda. Eyi y'enzumwa eyikaleka ithwaminyanya ngoko omukama syalikanaya n'omundu meso oko meso munabwire, hathe, erikania erilhaba omo masako kutse eribahikako n'eribabwira eky'erikolha bangalhamiibwa. Omukama nomwangabere hano munabwire syangabwira omundu y'ekyerikolha (Emiibiiri 9), kandi amakolhakyo, iyikendibya iyanengulhu Yowene eyabirithuulhwa. (Galatia 1:6-9), nokweryo sihangabere ekyireka inyasa eryasakolha ekyabiri l'aghira omundu erikolha (Mariko 16:15,16). Omo myatsi eyindi, Omukama syangakolera omundu y'ekyanganayikolera iyuwene-wene.

Ekyireka ibabya eriyihanda kutsibu oko muthuuliri oyukathwalha Engulhu Yowene oko bandi ni kusangwa Engulhu Yowene yabiribikwa omo malegha w'omuthaka. Kristo, mwabuugha athi, "*Neryo mughende, muyire abigha oko bihanda byosi; Oyukikiriraya kandi iniabiribatiisiibwa asyalhamiibwa; niikwa oyuthi kiriraya asyasiingwa*" (Mariko 16:15,16). Kandi, thukasoma, "*Kusangwa Obuli mundu oyukalakira eriina ly'oukama asyalhamiibwa. Neryo basyamulakira bathi, oyo bathikiriraya? Kandi basyikirirya bathi oyo bathe bathowa ko mwatsi kwehi? Kandi basyowa bathi, bamathendithumwa kwehi? Ngoko kisakire kithi, Ni kibuya ndeke eriowa erihika ly'abandu bakalettha engulhu Yowene*" (Baroma 10:13-15). Okwighunzerera, "*Uthule Engulhu Yowene*

yiwe! Kandi uhathikane erithuulhayo omo mighulhu yosi, oko mughulhu mubi, kutse oko mughulhu owene” (2 Timoteo 4:2). Ukalhangira ngoko omukama abirithwamo eriberererya erisonda liwe erilhaba omo nzira eyi. Eyosi yanguhire.

Ekyo kyine kya kwenene, Paulo mwasakangira abikiriirya be Tesalonika: *“Nyamuhanga mwababirikira busana nekyi, omughulhu thwabakangiriraya Engulhu Yowene imwathoka eribana olhukengwa lhw’omukama wethu Yesu Kristo”* (2Tesalonika 2:14). Paulo akabuugha athi Omukama bwabirikira Abatesalonika erilhaba omo Engulhu Yowene. N’ibuugha ambu, Paulo yuwakangiriray’abo, mubow’akyo, bamaliigh’akyo, nokweryo mubabirikirwa eryasa eyiri Yesu omo nzira eyi. Oghundi musiindo ow’erikaniryamo ekyi, Kristo mwababirikira eryasa lhama erilhaba omwikangiriribwa Engulhu Yowene.

Omughulhu ono, ni kuthi? Thukabirikirawa thuthi? Ithwe Bakristo ku thwabirikirawa thuthya busana n’engulhu iyaneyo. N’ibuugha ambu muthwabwirwa Engulhu, muthwow’ayo, thwamikiriry’ayo neryo Omukama mwathulhamya. Omughulhu thukathwalhira Engulhu Yowene yoko bandi, ekyindu ikyane kyighuma kyikabera eribya, kandi ikyathasyabya. Omukama syalibirikira omundu mughuma omo musiindo ono, n’oghundi omo musindo olya. Niikwa, akabirikira mughuma, n’abandi omo musindo iwan’owerilhaba omo Ngulhu Yowene nguma.

Ni kwenene Nyamuhanga omughulhu ono akakanaya erilhaba omo Kristo. Kristo akakanaya niikwa erilhaba omo kyiinywa.

Abakolhobera Kristo bawithe olhukwamirwa lhw'eryiathuulira abandi. Erilhaba omo nzira eyi, Omukama akakolha erilhaba omo muthuuliri w'engulhu Yowene erikangania erisonda liwe n'erilhalirya abaherire eryasa eyali (Matayo 11:28-30).

Olhumimbi lhwethu olhw'erimbere ly'erithuulha Engulhu nolhw'akabiri ly'eriwathikya abakasonda eryolhobera omukama (Matayo 28: 19-20). Kyireka Paulo inyabuugha athya: *“Kusangwa Kristo mwathanyithuma eribatiisya, niikwa anyithuma erithuulha Engulhu. Nerithuulhagho butsira omo kyisehya ky'ebiinywa by'abandu, neryo omusalaba wa Kristo akasyayirwa mo buyira. Kusangwa omwatsi w'omusalaba ni bukyiru oko bandu abakahera, niikwa ni buthokyi bwa Nyamuhanga busana nethu, ithwe thukalhamiibawa”* (1 Korinto 1:17,18). Akabuugha athi mwathathumwa eriyabatisya abandu. Olhumimbi lhwewe olhw'eriimbere lhwabya iry'erithuulha Engulhu Yowene neryo kubikasubukana inyabatisya abakasonda eryolhobera Omukama.

Wanewathowa Engulhu Yowene? Wamabya isikobiri bithya, lithya wamathunga eribirikirwa oko Ngulhu Yowene – eribirikirwa eryasa eyiri Kristo. Umwolhobere akendi kulhamya.

Ebibuulyo

1. Thonda ebirengekanio byawe ngoko Nyamuhanga akabirikira omundu eryasa oko mulhamo.
2. Omukama akanakanaya n'omundu ebiro bino?
3. Akanaya athi?

4. Soma Hebrania 1:1,2.
5. Nyamuhanga akakanaya erilhaba omo ndi?
6. Ghaniraya oko Matayo 17:5.
7. Nyamuhanga akanakanaya na mundu meso oko meso munabwire?
8. Yoane 20:30,31 hakabuugha hathi kyi?
9. Eryikirirya likasa lithi?
10. Eryikirirya likanasira omo yindi nzira?
11. Hali eryikirirya lingahi?
12. Engulhu Yowene yahunikirwe omo kyi?
13. Thakania oko malegha w'omuthaka.
14. Hereraya eby'erileberyako omo Emiibiiri y'Abakwenda ah'omukama aby'akolire erilhaba omo mthuuliri w'engulhu erikangania erisonda liwe oko mundu.
15. Ekyaleka omukama athakanirya mundu mughuma-mughuma akabakanirya eky'erikolha imo balhamibwa, nikiyi?
16. Ghanira oko Mariko 16:15,16.
17. Thukabirikirawa thuthi eryasa eyiri Omukama munabwire?
18. Tha thonda ngoko thukabirikirawa n'Engulhu Yowene.
19. Olhukwamirwa lhwaghu ni lhwahi oko Kristo?
20. Buugha ekyo Paulo athumawa eryasa kolha.

Eky'eryigha 4

Eryolhobera Engulhu Yowene

Omundu anganolhobera Engulhu Yowene? Hane abandu abakabuugha bathi ekyi sikyangathokekana. Niikwa Biblia yikakangirirya ekyithe ekyo. Hali ebikulhu-bikulhu by'engulhu Yowene, ebyabirikwamwa, kandi thuwithe eribiyikirirya. Neryo hali eby'engulhu Yowene yikalhaghira, ebithukendikubungulha omo by'eryigha ebiri embere, kandi thukatholera eribyolhobera. Eby'eritsuukirako, thuthasyakamathaya ebikulhu-bikulhu byomo Ngulhu Yowene. Paulo mwathondekania byo omo 1Korinto 15:1-4 ilhw'olhuholho, eritsikwa, n'erilhubukiibwa Iya Kristo. Niikwa ekyi kyiwithe buhugho bwahi nobwowa? Ni bunene, ngoko thukaya lhangira. Hulikirira omukwenda akasakangira abikirirya be Roma: *“Niikwa wasingya oko Nyamuhanga, kusangwa nomo mwanabya bakobe bebibi erimbere, lino mukowa nomuthima ghosi erikangirirya lyekwenene eryo mwahabawa. Kandi mumwaboholhwa oko kyibi, neribya bakobe berithunganene”* (Baroma 6:17,18). Ghuuminyerere ngoko babya bakobe oko kyibi neryo mubasuba bakobe berithunganene. Ekyaletha embirinduke ni kyahi? Ni kyolho, kyekyi: *“mub'olhoba eriilhwa omo mithima y'engangirirya erya eyobabya baheberwe”*. Omo biinywa ebindi, mubaliigha Engulhu Yowene ya Kristo. Niikwa bangolhobera bathi ebikulhu-bikulhu? Sibanga thokire kandi mubathathoka. Engangirirya hano ly'eriholha, eritsikwa n'erilhubuka Iya Kristo. Niikwa engendo y'akabiri: babya ibabiryolhobera eyisosire ng'eyo. Imw'ikolha bathya, babya ibabiriholha omo bibi byabu, ibabiritsikwa nomukama wabu omo maghetse

w'eribatiisiibwa, kandi ibabirilhubuka erilhwa omo syosinda sy'amaghetse. Ebi bikabanika omo kyihande ekyikatsuuka omo Baroma 6. Thusome: *“thubuughe tutiki kwehi? Thukwamirire ebibi olhukogho lhwa Nyamuhanga imulhwakanyirira kwehi? Eyihni nahake. Ithwe thwamaholha oko bibi, thwanganathoka eriswabya omo bibi kwehi? Simwasi kwehi? Ithwe bosi ngoko thwabatiisiibawa erimathikana na Kristo ithwabiribatiisiibwa erimatikana n'olhuholho lwiwe kwehi? Neryo omo lhubatiiso lhwehu thwabirithabwa haghuma na Kristo omo lhuholho luwe, neryo ngoko Kristo alhubuukiibawa oko baholi omo lhukengerwa lhwa Thatha, lithya nethu ithwathoka erilendera omo mibere y'engebe nyihya-nyihya. Kusangwa thwamabohana nayo omo lhuholho luwe, kwenene lithya thwasyabya bughuma naye omw'ilhubuuka liwe, kusangwa thukanasi ngoko omundu wethu wakera abiribambwa oko muasalaba haghuma na Kristo, neryo amalengekania w'ebibi athoke eriheribwa, sithubye kandi abakobe bebibi”* (Baroma 6:1-6). Neryo oyu w'omusindo w'engangirirya eyo babya ibabiryolhobera ngoko Paulo akakanganaya hanyuuma omo Baroma 6:17,18. Sibyebyo bisa, niikwa obuli mughulhu omundu akabya amolhobera Engulhu Yowene ya Kristo, akolhobera engangirirya eyiri ngeyi, kutse akalebaya ekyuutsuu ky'olhuholho lhwa Kristo, eritsikwa, n'erilhuubuukiibwa omo mibiiri eyakakolha.

Thukalholya embere, thukasonda erilhangira bihano by'engulhu Yowene nga ni byahi kandi ngoko bikasuunzikaniibawa n'olhuholho, eritsikwa, n'erilhuubuukiibwa lya Kristo. Omukama eyuwene-wene mwalhaghira abakwenda athi, *“Neryo Yesu mwabwirabo athi, Muye omo kyihugho kyosi muthulhughanaye Engulhu Yowene oku bandu bosi,*

Oyukikiriraya kandi inyabiribatiisiibwa asyalhamiibwa; niikwa oyuthi kiriraya asyasiingwa” (Mariko 16:15,16). Iyo Matayo mwasakanga athya, “Neryo mughende, muyire abigha oko bihanda byosi; mubatisay’ebo omo liina lya Ise, n’ery’Omughalha n’ery’Omulumu Abuyirire. Mukangirirayebo bakole ebyosi ebyo nabiribahana. Kandi mwibuke! Ingye ko ndi haghuma nenyu erihika okw’ihwere-rera ly’emighulhu” (Matayo 28:19,20). Lithya mukasamalira ngoko Omukama akahereraya erilhaghira liwe athi Engulhu Yowene yithuulhawe. Isyi balhaghira lisa, niikwa akakwama-kwamanaya erilhangira athi erilhaghira liwe lirebe likatholera eryolhoberwa omundu omwathoka erilhamiibwa. Omwiberereryaerilhaghiraly’omukama, abighabakasanganawa ibanemu kangirirya Engulhu Mbuya y’omo Muyi we Yerusalema (Emibiri 2). Ibanemukangania ebikakanganaya bithi Kristo kwenene ni Mughalha wa Nyamuhanga. Abandu babere babirighongonokwa omw’ekyi, ebisakirwe bikabuugha bithi mubuulya ekyibuulyo ekyi: “Balhume banyikyethu, thukolekyi kwehi?” (Emiibiiri 2:37). Neryo erikangania ko habya eky’erikolha, Petero mwabasuubirya athi, “Mubindule emithima yenyu, muleke ebibikandi obuli mundu abatiisiibawe omo liina lya Yesu Kristo busana n’eribuyirwa ly’ebibi byenyu, neryo mwasyabana olhusuunzo lhwa Nyamuhanga w’Omuliimu Abuyirire” (Emiibiiri 2:38). Nibya, n’omughulhu omukama abuthukira Saulo, omo Emiibiiri 9 mwasonda eriminya ngangakolha kyi imwabana erilhama. Linyuuma Anania nayo mwasa inyanemu-buulya ikwane kyighuma (Emiibiiri 22:16).

Emiibiiri 8 thukasangaho Filipo akathuulha omwatsi wa Kristo oko Mukonwa neryo ebisakire bikabuugha bithi nayo mwasonda eribatiisiibwa. Niikwa muhulikirire omukania

owakwamako: “Neryo Filipino mwabuugha nayo athi, wangabatisiibwa wamiikiiriirya n’omuthima wawe ghozi. Naye mwasuubirya athi, namikiiriirya ko Yesu Kristo ni mughalha wa Nyamuhanga. Neryo mwahamulha athi egali yihangane, neryo ababiri boshi, Filipino n’omukulhu oyo, mubandaghalira omo maghetse neryo Filipino mwamubatiisya. Neryo omughulhu balhuua omo maghetse, omuliimu w’omukama mwabakulha Filipino n’omukulhu oyo mwathaswamulholhako, niikwa mwaya omo lhughendo lhuwe inyatsumwirwe ndeke” (Emiibiiri 8:37-39).

Lithya ebilhayiro by’engulhu Yowene ni byahi? Eky’eriimbere, Omundu awithe erihulikirira Engulhu Yowene yikathuulirwa. Eky’akabiri, omundi niw’erikyirirya Nyamuhanga. Eky’akasathu, awithe eriyisubamu ebibi bwiwe ebyosi. Ekya kaani, ni w’eriyisinga omo buno bwiwe athi Kristo ni Mughalha wa Nyamuhanga. N’eky’akathanu, awithe eribatisiibwa, inyatsikwa omo maghetse, busana n’erisangulhwa ly’ebibi byiwe.

Thunemughenda embere n’ebirengekanio ebi, omw’olhobera ebilhayiro bye Engulhu Yowene, omundu akaholha oko bibibi byiwe. Ni buugha ambu, abiryowa Engulhu Yowene neryo ebirikirirya Omukama erihika oko lhulengo olw’eriyisubamu ebibi byiwe ebyosi. Neryo, ekyi kyikiimanira eriholha oko kyibi. Ekyikasubuka oko luhulho ly’eritsikwa. Eri ni tsikwa omo maghetse. Thwabilhangira Filipino n’omukonwa bakandaghalira omo maghetse imohabya omukonga w’eritsika. Na Kolosai 2:2 na Baroma 6:4 bikabuugha bithi eritsikwa likabya omo maghetse. Eritsikwa lyamabiribya,

hakasa erilhubuukiibwa. Emiibiiri 8 hakabuugha hathi Filipino n'omukonwa mubahulhuka omo magheste. Baroma 6 naho hakabuugha oko matsiko n'erilhuubukiibwa, neryo eribiba n'erisuumbwa busana n'erighendera omo ngebe nyihya-nyihya. Kobiri bithya, om'olhobera ebilhayiro binu ebyanguhire, thukalhangira omundu akakangania olhuholho, eritsikwa n'erilhubukiibwa. Lithya, risa, niikwa obuli mundu oyukolhobera Kristo yukakolha ekyutsutsu ky'olhuholho ekyi, eritsikwa n'erilhuubuuka.

Omo Yoane 3:3-5, Kristo akakanaya okwibuthwa n'amagheste hayiima n'Omuliimu. Oyu ni nzira eyindi ey'eribuugha ambu ikyan'ekyighuma, kusangwa omundu amatsikwa omo maghetse, neryo hakabya erihulhukamo kutse eributhwa omo maghetse, ekyikamiinyiisaya erilhwa omo yisinda y'amaghetse. Busana nekyi, omundu akalhw'eyo inyabbasulira omo ngebe nyihya, kusangwa lino akabya ini kyihangikwa kyihya omo Kristo (2 Korinto 5:17).

Ebihano niby'eryolhobera, neryo abo abakolhober'abyo bakahembawa kwenene. Mukatholere imwibukiibwa ngoko sihali n'ekyighuma oko bihano ebi ikyanga kyirukwa ng'ekyithayitsutsirwe kutse ekyithawithe mubongo. Linyuuma w'eryolhobera obuli kyihano, nim'omukama akalhamaya omundu, erimuthomekera oko Kanisa, erimuha emighisa eyosi ey'omulimu, n'erithunga amaha w'engebe y'erikotha.

Nomo kyine kyithi Engulhu Yowene ni y'abosi, kandi niy'erikwamwa n'abandu bosi erilhamiibwa imulyathungwa, niikwa Paulo akalira, athi "Niikwa ababiri liigha Engulhu

Yowene si babosi; kusangwa Isaya akabuugha athi, “*Nindi yuwabirikiiriya erithuulhagho lyethu kwehi?*” (Baroma 10:16). Ekyi kyikamiinyiaya kyithi omundu niw’erikirirya imwalhamiibwa. Niikwa biri bithi oko bathikiriraya? Akabuugha athi, “*N’inywe mukaghalhawa asyabaha eriluhuka, haghuma nethu, omughulhu omukama Yesu asyabuthuka omo muliro owa kaka erilua elubulha haghuma nabamalaika biwe bamaka. Kandi asyasuyira abathasi Nyamuhanga, nabathekenga Engulhu Yowene y’omukama wethu Yesu. Basyasuyirwa omwihera lya kera na kera, n’erisolholhwa embere sy’omwami mukulhu, noko lhukengerwa lhw’obuthokyi buwe*” (2 Tesalonika 1:7-9). Erikwamana n’ekyi, erithendiminya ko Nyamuhanga aneho line oko luhandi olhundi, n’erithalhuka eryolhobera Nyamuhanga line oko lhundi, eritswera lyabo lisosene: Erithuuhulya ly’omukama. Kristo mwabuugha athi abakolhobera Engulhu Yowene bakesyalhama, niikwa abathikiriraya bakesyatswerwa (Mariko 16:16). Emyatsi eyo eyosi yikakanganaya ngoko sihendisyabya eribalha okwabo abathileghana omulhamo wabu (Hebrania 2:2,3).

Ebibuulyo

1. Omundu ang’onolhobera Engulhu Yowene?
2. Thonda ebiku-bikulhu by’ Engulhu Yowene.
3. Soma Baroma 6:17,18.
4. Abaroma mubolhobera kyi?
5. Thonda omusindo w’engulhu eyindi ngabya wahi.
6. Oluholho lhw’omukama mulhwasunzikaniibwa nakiy?
7. Baroma 6:1-6 hakakangiriray’akiy?
8. Kanaya oko Mariko 15,16 na Matayo 28:19-20.

9. Busana nakyi omukama mwalhaghira athi habye erithuulhughania Engulhu Yowene?
10. Thonda ebihano ebikatholera erikwamwa omulhamo imwabanika?
11. Kanaya eby'abigha bakangiriraya.
12. Ghaniraya oko bukulhu obuli omo Emibiiri 2:38.
13. Filipino mwakangirirya omukonwa yo bihi?
14. Thonda ebilhayiro by'Engulhu Yowene.
15. Eryolhobera ebihano by' Engulhu Yowene lihambire lithi ok'olhuholho, eritsikwa n'erilhubbukiibwa?
16. Ni mo musindo wahi owo Yoane 3:3-5 hakatholera omo byosi ebi?
17. Omukama akalhamaya omundu y'omughulhu wahi?
18. Nindi oyutholere eryolhobera Engulhu Yowene?
19. Bakesyabya bathi abathyolhober'ayo?
20. Nyamuhanga anemwendisyabuyira omundu busana n'obuthaminya?

Eky'eryigha 5

Eryowa Engulhu Yowene

Eky'omundu akowa kyanganamulethera eky'akendyikirirya. Amowa ebithere akabya inyakendyikiriirya ebithere. Kwilhabirirya amabya isyangabulirirya ebiri omo masako neryo akathek'amo omuuhwa eryigha okwenene. Amowa eby'okwenene akabya inyanganikirirya eby'okwenene. Kokyiri kithya ky'amubongo eryowa enzongole y'ekyiinywa kya Nyamuhanga. Paulo akabuugha athi, "Lithya eryikiriirya likasa

busana n'eryowa, n'eryowa likasa busana n'erikangiiribwa, n'erikangirirya eryo ni Kristo. (Baroma 10:17). Ghukatholera iwaminyerera ghuthi omwatsi omunene hano ly'eryowa, niikwa isikwami-kyowa kyindu kyosi-kyosi liriryo eryowa ekiinywa kya Nyamuhanga, neryo omo mukatholera imwalhuua erikirirya ory'okwenene.

Ekyibuulyo kyiri kyithi omundu angathoka athi eriminya athi eryikirirya liwe liseghemire oko kyinywa kya Nyamuhanga. Bindubingyibikakangiriribawa omoliinalya Nyamuhangakandi bingyi bikakaniibawako nge'biryalhwa omo bihandi by'e Biblia. Bingyi kubyo bikathalhanako. Nokweryo, hali erighabulhana nekyimbunzange. Neryo omundu angamiinya athi, eby'alyowa nganina by'okwenene? Okwenene ly'erighenda omo Biblia iyiyene-yene. Sihabye mundu ukiikiiriraya erikangirirya kutse erithuulhagho ly'omuhindo, nomuwangabya ighumwanzire kutse ighumusiikirye bungahi. Emyoyo yethu niy'obughuuli bungyi sithutholere erihira eryikirirya nerilhama lyethu oko biinywa by'abandu nzwiri. Niikwa, thukatholera ithwaghenda oko nguununuko y'okwenene iye Biblia nyisa. Thukatholera ithwasoma n'eryigha amasako imothwathoka eriminya ngoko thuli omo nzira y'okwenene. Byamabya isibiri bithya neryo ithwayihengulh'aho.

Kristo mwabuugha athi, *“Mukasoma amasako, kusangwa mukaghaniraya muthi muwithe engebe yerikotha. Kandi amasako ayo akathuulhagho busana naghe”* (Yoane 5:39). Neryo thukasoma oko bandu be Beroya, ababya ibabiryowa Paulo akathuulhira: *“Niikwa abandu be Beroya babya bandu babuya kwilhaba abe Tesalonika. Mubangirira ekyiinywa*

kya Nyamuhanga n'omuuhwa, ibakasondaya omo masako obuli kyiro erirebya emyatsi eyi ngani kwenene. (Emiibiiri 17:11). Lithya thaghanirya kukyo! Hano thukasanga abandu bakigha ekyiinywa kya Nyamuhanga nibya na Paulo inyabiribakangirirya, imo baminya ngalyababwira okwenene. Abandu b'omughulhu wa Paulo bamabya ibanganasondekania omo masako inyabiribathuulira nibya, neryo, ithwe thukatholera ithwarondererya bungahi omughulhu thukowa abakangirirya ab'omughulhu ono? Sikya mubongo obuli muyiima okwithwe erikolha ekyi? Byamabya ikobiri bithya, sihangabere erithalhuka omo bisomo kandi hangabere abakangirirya b'amabehi bake.

Paulo mwahabulha omuthuuliri mulere iyo Timoteo eryigha ekyiinywa kya Nyamuhanga. Thamuhulilkiriira: *“Uyire omuuhwa erisiimwa embere sya Nyamuhanga ng'omukoli w'omubiiri oyuthe hemuka busana n'omubiiri wiwe kandi oyukakangiriraya ndeke-ndeke omwatsi w'okwenene wa Nyamuhanga”* (2 Timoteo 2:15). Ni busana nakyi abandu bangyi sibasi ekyiinywa kya Nyamuhanga? Kusangwa sibaly'igha amasako. Busana nakyi bangyi bakathebaya omo mwatsi w'ekisomo? Kandi, ni busana sibalyigha, bakathoka eriminya okwenene n'ebithere. Busana naki bangyi bakaghanga-ganga busana n'ebihano bya Musa hayiima n'ebihano bya Kristo? Obuliitho bw'anobughuma; sibaly'igha, n'okweryo sibathaghabulha omo kwenene ekyiinywa eky'okwenene. Banyikyaghe, Paulo amabya imwasiima omuthuuliri busana n'esisoma ekyiinywa kya Nyamuhanga, simulilhangira muthi nethu thukatholera ithwakolha thuthya?

Yoane mwasiima abikirirya ab'omughulhu wiwe, “*Abanze bethu, simwikiriraye obuli kyirimu niikwa mulenge oko birimu by'abandu erirebya ngabikalhuua oko Nyamuhanga; kusangwa abaminyereri bangyi b'amabehi babiriyitsatsanga omo kyihugho*” (1 Yoane 4:1). Hano omukwenda akalhayira abandu ba Nyamuhanga erithendikirirya omulimu w'obuli muthuuliri busana n'enzumwa ey'anguhire yithi, abakangirirya bamabehi bangyi babiriyitsatsanga omo kyihugho. Niikwa thwangaminywa thuthu omuthuuliri niwa kwenene kutse eyihi? Akahereraya amenge athi ithwalengabo. Ekyi thwangakyikolha thuthi? Omwisunzikania erithuulhagho n'erikangirirya lyabo hayiima n'ekyiinywa kya Nyamuhanga. Thwamakolha thuthya, ithukendiminyerera oyukabuugha okwenene n'oyithi buughako.

Omughulhu Filipino asangana omukonwa oko gali yiwe mwasanga anyakasoma amasako neryo ebisakire bikabuugha bithi, “*Neryo Filipino mwatsuuka oko mulhondo oyo w'amasako, mwamuthuulira Engulhu Yowene ya Yesu*”. (Emiibiiri 8:35). Busana nekyo, erikirirya eryokwenene mulyakolhwa omo muthima wiwe kusangwa abya mwowa embere sy'omukama. Omo Emibiri 8:5, thukalhangira Filipino akandaghalhira eSamaria n'erithuulira Yesu oko bandu. Linyuuma, omughulhu Petero na Yoane babunga, ebisakire bikabuugha bithi mubathuulhagho ekyiinywa ky'omukama neryo mubasuba eYerusalema (Emiibiiri 8:25). Wamalhangira ngoko ensumwa ngulhu y'erithulhagho lyabo yabya yiseghemire oko Kristo n'ekyiinywa kya Nyamuhanga.

Hali nzira ibiiri esyo thwangowiramo engulhu mbuya.

Ey'erimbere ngoko thwamabiryowa ahighulhu, omw'iyisomera ekyiinywa kya Nyamuhanga ithwebene-bene. Omwikolha thuthya, thuwithe omuyisa w'eryowa Krsito, Paulo, Petero n'abandi bandu ba Nyamuhanga erilhaba omo kyiinywa kya Nyamuhanga. Niikwa n'omughulhu ono, sib'abandu bosu abakathoka erisoma neryo ekyi kyikamiinyisaya ngoko ibo ni beryowa ekyiinywa kya Nyamuhanga kyikalhaba omo muno w'abandi. Omo musindo oyu hakabya abandu b'amisindo ebiri: omuuthuuliri n'oyukahulikirira. Busana nekyi hali olhukwamirwa olhunene olhuhambire okomundu mughuma-mughuma oyukayisombolera erikangirirya ekyiinywa kya Nyamuhanga. Ukatholera eribya wa kwenene oko kytabu. Amakolha oko kyiinywa kya Nyamuhanga n'obuthaleghana kutse n'amathebo, neryo akathalya omundu, neryo akabya inyakendisyalholha okwisuyirwa. Paulo akakunga abikiiriirya banyikiyiwe erisamalira abo abakaletha erighabulhamo erilhaba omo bisehya n'eritheba ab'emithima myolho (Baroma 16:17,18). Neryo oyukathulirawa nayo awithe olhukwamirwa obw'erilhangira athi ebyakowa nina kwenene athya liigha byo. Oko lhuhandi ly'abo abakayisomera ekyiinywa, bakatholera ibasondekania omo masako ibobene-bene. Niikwa oko lhuhandi lhw'abathe bangayisomera, omulyambo ni munene. Bangakolha kyi kwehi? Erilhangira bathi bakathunga okwenene, bakatholera ibathunga omundu ow'eribasomera omo kyiinywa kya Nyamuhanga. Kwenene hane enzira ey'eryighiramo okwenene omundu ndi, amanza eriminyayo.

Ni kyindu kyikulhu obuli mundu eryowa Engulhu Yowene ey'omukama alhaghira abigha eriya omo kyihughu kyosi, eriyathuulha engulhu (Mariko 16:15). Kandi ebisakire

bikabuugha bithi baghende erikangiriirya ekihugho ekyosi (Matayo 28:19). Busana nakyi? Omundu ghosi akatholera eryowa engulhu mbuya, okwenene, ekyiinywa kya Nyamuhanga, angikiriryakyo, olhoberekyo neryo alhamiibawe. Paulo mwasakanga, “*Ghuyitheghaye kandi ghutheghaye erikangirirya lyawe. Kandi ghuyitsinge omo mwatsi eyi, kusangwa wamakolha ghuthya wasyayilhamya haghuma n’abakakuhulikirira*”. (I Timoteo 4:16). Omundu angalhama athi erilhaba omw’ihulikirira? Ngoko kyabiribuuwa eryikiririya ko likasira omwihulikirira n’erihulikirira ko likakolhaya okwikirirya n’eriyolhobeka. Eriyolhobeka likaletha omulhamo. Ekyo kyo Paulo akakanay’ako. Wamasoma eby’erilhangiriirako ebi eby’eribinduka omo kiyitabu kye Emiibiiri y’abakwenda, ghukendilhangira ng’oko obuli ndambi habya ihane omuthuuliri w’engulhu. Omubiiri wiwe abya ini wahi? Ighow’erithullira enguulhu Yowene okwabo ababya bayisunzire erilhama. Nokweryo, babere bowa engulhu mbuya, mubikiriryayo neryo mubalhamiibwa. Byangabere bithi, kubathathunga omuyisa ow’eryow’ayo? Sibangabere ibakalhamiibawa kusangwa erikiriirya likasa erilhaba omwihulikirira ekyiinywa kya Nyamuhanga, kandi ahathe erikirirya, omundu syawithe kwangatsemesya Nyamuhanga. (Hebrania 11:6). Ok’omughulhu w’erihindukiibwa, ebihambire oko mughalha wa Nyamuhanga iyo Yesu Kristo, Nyamuhanga mwabuugha athi “Abere akysinabuugha ekyithu ekyikangabasenie mukyasukuliry’abo; neryo omulenge mwalhwa omo kyithu athi, oyu nimughalha waghe omwanze, namamutsera ndeke; mumwowe! (Matayo 17:5). Kandi thukasoma ng’oko Nyamuhanga akakanaya erilhaba omo mughalha wiwe Yesu. (Hebrania 1:1,2). Okwighunzerera,

thukasoma ng'oko Kristo yo Kyiinywa (Yoane 1:1,2). Nikya mubongo, thukatholera ithwahulikira Kristo n'erimwolhobera oyuwasa thulhamaya. Wibirirawe eby'omundu akabuugha. Obulengekania bwiwe, erighanirya liwe, erikangirirya liwe n'ebindi, ni buyira wamasunzikaniabyo n'byo omukama abiribuugha. Thukatholera ithwowa Kristo. Thukatholera ithwikiirirya Kristo. Thukatholera ithw'olhobera Kristo.

Okwighunzera, Yakobo mwahandika athi "*Muby abandu abakakolha n'eryowa ebiinywa bya Nyamuhanga, butsira abakahulikirira lisa n'eryitheba*" (Yakobo 1:22). Nikya ky'amubongo erihulikirira ekyinywa enzongole kya Nyamuhanga, kandi nibya ni kyolho erisubulira aho neryo omundu inyahera. Okwenene sikwangathuulhamya thuthalya yolhobeka. Kyireka ithwabya bakoli bekyiinywa butsira abahulikiriri buyira. Kyangabya kyibuya thwamibuka omwatsi oyu.

Ebibuulya

1. Eky'omundu akikiriraya kikaseghemera oko kyi?
2. Eryikirirya likasa lithi?
3. Omundu anganaminyerera athi, ngoko erikiriirya liwe litsukirire oko Nyamuhanga?
4. Omundu anatholere inyikirirya ekyiinywa ky'omundu ng'ekyerighunzerera?
5. Soma Yoane 5:39.
6. Busana nakyi abikiririya be Beroya mubasiimwa kwilhaba abe Tesalonika?
7. Ebithere by'omo kiso mo byangalhusiibwamo bithi?
8. Ni bubuya bwahi obuli omw'igha amasako?

9. Thonda ebikalhwa omo buthaminya kyiinywa kya Nyamuhanga bw'omundu.
10. 1 Yoane 4:1 hakakangiriraya kyi?
11. Thonda ebyo Filipino athuulira Omukonwa.
12. Busana nakyi Filipino mwandaghalira eSamaria?
13. Nimo nzira ibiri syahi esy'eryowiiramo engulhu mbuya?
14. Omukama akanahereraya omuthuuliri y'olhukwamirwa oko kyathuulira abandu?
15. Thukatholera ithwahulikirira iyondi?
16. Kristo akakanaya nethu athi, omughulhu ono?
17. Thukatholera ithwabya bahulikiriri ba musindo wahi?
18. Okwenene kukalhamaya mughulhu wahi?

Eky'eryigha 6

Erikyirirya Omo Nyamuhanga

Omuasakangi muhebrania akathubwira athi, “Niikwa eryikirirya n'iminya kuundu emyatsi eyo thukahirako amaha, kandi n'irigha kwenene emyatsi eyo thuthelhangira. (Hebrania 11:1). Eryikirirya likabuughiibawako eribya n'amaha awakalire, eriyikethera n'eri liigha, kandi ekyo ikyiletha obw'owa. Aho hohali omusingyi oyu owakalethera omundu eribya mwikiiriirya kandi ni busana n'eryikiiriirya ikyathuma omundu erimathikana na Kristo.

Kandi omusakangyi muhebrania akabuugha athi, “Kandi ahathe eryikiiriirya omundu syangathoka eritsemesya Nyamuhanaga

kusangwa litholere oyukahika oko Nyamuhanga iniikirirya ko Nyamuhanga aneho kandi kwakahemba abakamusonda-sonda. (Hebrania 11:6). Ghukatholera iwaminya ebindu bibiri ebiri omwikirirya Nyamuhanga. Eky'eriimebere, omundu akatholera inyikiiriirya athi Nyamuhanga aneho, ekyakabiri athi, Nyamuhanga akahemba abo abosi abakamusonga-sonda. Eryikirirya ly'omundu kyangikiriiribwa lithi, lyamathalhuka okw'ebi?

Thwangayiwathikya thuthi erilhangira thuthi thukikiriraya ng'oko Nyamuhanga ane omo Lhubulha? Thwamalhangira ebindu ebihangikire ebyosi; ekyanya, bisoro, engebe y'omundu – ebyosi ebi bikathulholhaya oko muhangiki. Daudi mwabuugha athi, “Olhubulha lhukakanaya olhukengerwa lhwa Nyamuhanga, n'ekyanya kyikabisuulha ndeke eby'abirikolha. (Esyonyimbo 19:1). Omukyiru musa yuwangabuugha athi sihali Nyamuhanga (Esyanyimbo 14:1).

Niikwa sikyirighunza erikiriirya ng'oko Nyamuhanga aneho. Ghukatholera iwikiiriirya ghuthi Yesu Kristo ni mughalha wiwe. Kristo iyuwene-wene mwabuugha athi, “*Simuhanga-hangaye emithima yenyu; mwikiririraye Nyamuhanga, naghe munyikiriiraye*”. (Yoane 14:1). Ni milhondo mingyi eyikakangiriraya ebindu ibyane bighumerera. “Neryo Yesu mwabuugha n'omulenge munene athi, oyukanyikiriraya syalinyikiriraya ingyuwene, niikwa akiikiiriiraya oyuwanyithuma. (Yoane 12:4).

Biri bithi okwabo abathikiiriiraya Kristo? Amasako akathubwira oko bandu aba. Yesu mwabuugha athi, “Oyukikiriraya

omughalha syalitswerawa, niikwa oyuthathikirirya inyabiritswerwa kusangwa syalithikirirya oko mugha, ekyusa kya Nyamuhanga. (Yoane 3:18). “Oyukikiriraya omughalha awithe enege; niikwa oyuthe kenga omughalha syendisyalholha oko ngebe, niikwa n’erihithana lya Nyamuhanga limwikereko kera na kera. (Yoane 3:36). “*Kyikaleka inababwira nyithi, mwasyalhuua omo bibi byenyu kusangwa mwamathendikirirya kunyiri iye, mwasyaholha omo bibi byenyu*” (Yoane 8:24). Erilhw’omo milhondo eyithuyasoma omo masako, ni kwenene thukalhangira emighisa eyikalhwa omwikirirya omukama, kandi endambi iyanenguma thukalhangira emitsumo, amalighe n’ebisuyiro ebikandisyasira abakathwamu erithendikiirirya.

Niikwa ni mani mangahi aghothukahira omwikirirya Nyamuhaga na Kristo ng’omughalha wa Nyamuhanga? Thwanganabaliigha omo bulengekania, niikwa ekyi kyisa ky’ekitholere? Ekyiinywa kya Nyamuhanga kyikathukanganaya ng’oko thulib’erikangania erikirirya lyethu, kutse erikangania okwenene kwalyo. Ng’ekyerilhangirirako Kristo mwabuugha athi, “Busana nakyi mukanyahulhamo Mukama, Mukama, isimulikolha ebyo ngababwira?” (Luka 6:46). Kandi siy’omundu oyukanyahulha athi, “*Mukama, Mukama yuwasyingira omo bwami bw’elhubulha: niikwa yanoyukakolha erisonda lya Thatha waghe oyuli Elubulha. Bangyi basyabuugha naghe bathi, mukama, mukama, omo liina lyaghu muthuthathuulha omwatsi wa Nyamunhanga kwehi? Nomo liina lyawe muthuthahigha esyombinga kwehi? Kandi omo liina lyaghu muthuthakolha ebithiko-thiko kwehi? Neryo nasyabwirabo nyithi, Mundabaminyana na kera. Mulhwe ahonyiri, inywe bakolha nabi*” (Matayo 7:21-23).

Lithya abandu abo babya bikiriirya, n'erithomeka oko babya ibanemukolera omo bisomo, niikwa ekyabya kyathere ni kyahi? Babya isibalikolha erisonda lya Thatha.

Thukatholera ithwikirirya omo Mukama oko lhulengo lhw'erikolha eby'akabuugha athi ithwakolha. Busana n'ekyi, "erikirirya lisa" syiryangalhamya, kusangwa likabya iriholire. Yakobo mwahandika athi, "*Kolithya erikiiriirya lisa eritheko mibiiri, liholire*" (Yakobo 2:17). Akaghenda embere inyanemubuugha athi, "kusangwa ngoko omubiri owathemo kyirimu aholire, kolirilithya eryikiiriirya butsira mibiiri liholire. (Yakobo 2:26). Lithya omo milhondo minene eyi, omusakangyi oyulik'omuliimu akathukangaya athi kyikendisyathwalha ekyirengire okwaho "erikirirya lisa" omundu imonyalhama. Akasingika ekyi omw'ikangania ebilhabire oko kyighuma.

Omughulhu akanahiika abathuuliiri n'abakangiiriirya abakabuugha ambu "erikirirya lisa" ibayihambulya omo Yoane 3:16 ng'eky'erileberyako eky'emimanire yabo oko kyibulyo ekyi. Nomokyine kyithya aho sihali ekyo Kristo akabuugha okw'ikiiriirya lisa. Liriryo akabuugha athi thwamikirirya omo Nyamuhanga isithwendisyahera, ithukendisyathunga engebe y'erikotha. Niikwa ekyibuulyo kyiri kithi: omundu akendisyakolha kyi amikyirirya Nyamuhanga n'ekyiinywa kyiwe kyomo kwenene? Akendisy'olhobera omukama, inga, enzumwa ngulhu aho hoyiri.

Inga, erithungananiibwalikabyahobusana n'eryikirirya (Baroma 5:1), niikwa isi busana n'erikirirya lisa. Thukalhamiibawa omo lhukogho erilhaba omw'ikirirya (Efeso 2:8,9), niikwa isibusana

“n’eryikiirirya lisa”. Kwenene omundu isyakuba buhaka athi omundu anganasyalhama isyayisubiremo, eribatisiibwa, engebe y’obwikirirya, n’ebindi, nibya erikangirirya ghuthi “erikirirya lisa” omundu angakakwa omo myimanire eyo. Omo kwenene, omulyambo oghosi aseghemire omo ekyiinywa “erikirirya” nga kyikaminyisaya kyi, n’omusiindo w’erikirirya ow’eBiblia yikakanayako ly’eryikirirya eririho, erikirirya erikabbasulha, erikakolha, kandi ery’obwowa. Thukasoma aho Yesu alhangira eryikirirya eryabo abamulethera omulhume oyuthohiire (Matayo 9:2). Asondire erilhangira eryikirirya lyethu butsira eryowa thukakania okw’ikirirya k’obuyira. Akanza eririkangania kutse erilhangiralyo omo mikolere kandi n’omo bwowa bwethu oko kyihano kyiwe. Bithe bithya eryikirirya lyethu liholire kandi nirya buyira.

Erikirirya ni kyighuma oko bihano by’Engulhu Yoweneya Kristo. Likasa okwihulikirira ekyiinywa kya Nyamuhanga (Baroma 10:17). Likalholeraya omundu y’okwiyisubamo ebibi byiwe, n’eribuugha athi Kristo ni mughalha wa Nyamuhanga, n’ery’ibiikwa busana n’erilhusibwako amalholho, thukendibya ithunemu-minyerera obuli kyighuma okw’ebi omo by’eryigha ebiry’ahambere. Niikwa ghuthawithe eryikiiriirya eri, sihangabya eryolhobera ebilhayiro. Ahali eryikirirya ery’okwenene, obwowa bukakwam’ako. Ekyi sikyeri buulya erilhayira ly’omukama, neryo hakabya erikawama lisa. Sikyanga ghana erikangirirya lyiwe niikwa ikyikendi kiiriirya lyo.

Kristo mwabuugha athi, *“oyukikiriraya kandi akabatisiibwa yukendisyalhama: niikwa oyukaghana asyatswerwa”*

(Mariko 16:16). Niky'obuli kyiro, omundu amabya isyangiikiiriirya, syalyolhobera omukama. Kobine bithya, akabya amikiriiriirya akabya inyakendyobebera Kristo nekyo kyikamiinyiisaya ng'ko akendibatiisiibwa. Ekyo nikyolho, sikobiri bithya? Omwiyisubamo lyosi omo kyitabu kye Mibiiri y'abakwenda hakabya ihane omuthuuliri hakuuhi erithuulira omubiihya. N'ibuugha ambu, akowa, inyikiriirya engulhu mbuya, inyayisubamo ebibi biwe, enyabithondera embere sya Kristo, neryo inyabatiisiibwa busana n'erisangulhwako ebibi. Neryo hakabya kyi? Omundu akabya amabiryowa Engulhu Yoweneneryo akahika oko ndambi y'eryikiiriiryayo, sihali syabya bulitho n'ebindi ebisighere kusangwa akabya inyayithekathekire eryolhobera ebihano by'omukama. Omwatsi oghosi akabya okwikiriirya, kutse eyihi.

Thukasoma omo Emibiiri 2, oko kyithuunga ky'abikirirya. Abaghuma okwibo banabya nokwibambwa lya Yesu. Neryo Petero n'abakwenda mubathuulirabo engulhu mbuya. Mubakaniryabo ng'oko Kristo kwenene abya mughalha wa Nyamuhanga. Babere babiribabwira ekyi, ekyibuulyo kyabya ikyanguhire. "Thukole kyi kwehi?" (Emiibiiri 2:37). Omo myatsi eyindi, babya isibayithekathekire erikolha okwikiriirya lyabu, abandu abakahika 3000 mubakolha kulyo. (Emiibiiri 2:41). Ebisakire bikabuugha bithi Filipo mwathuulha Engulhu Yoweneoko bebihanda neryo bangyi mubikirirya bamabatiisiibwa (Emiibiiri 8:12). Filipo abere akangirirya Kristo yoko mukonwa, ebisakire bikabuugha bithi mwikiriirya neryo abere abiribwirwa eky'erikolha mwaliigha neryo mwaghenda nzira syiwe inyanemutsema. (Emiibiiri 8:26-39). Omo Emiibiiri16, thukasangaho olhughano olhwa Paulo na Sila ababwira omusirikani ambu akatholera inyikiiriirya

omw'inyathoka erilhama. Niikwa abya oyuthikiiriye. Neryo mubamuthuulira ekyiinywa kya Nyamuhanga hayiima neka yiwe ambu bangikiriirya, neryo ebisakirwe bikathubwira bithi ekyabya kyalhwire omo, omusirikani mwabathwalha n'erierya emikoba yabo, erikangania eriyisubamo, neryo mwabatiisiibwa, iyo nabeka yiwe abosi (Emiibiiri 16:30-33). Kubyana bithya n'oko bandi abayisubamu.

Erighunzerera, amasako akakangiriraya athi hali erikiiriirya lighuma (Efeso 4:5). Hali Biblia nguma, neryo abosi omughulhu bakaliigha n'eryikiriy'ayo, neryo ithwebosi thukathunga eryikirirya liyimerera, kandi erikyirirya liyiima eryo likendithulholya okwikolha bindu bighumerera – eryolhobera Omukama n'eribya bayiketherwa embere syiwe.

Ebibuulyo

1. Eryikiiriirya ni kyi?
2. Erikirirya nina kyikulhu? Bungahi?
3. Soma Bahebrania 11:6 wanathonda ekyo hakaminisaya.
4. Busana naki mundu ekirirya Nyamuhanga?
5. Erikirya ghuthi Nyamuhanga aneyo, ekyi kyisa kyikaghunza?
6. Hereraya emilhondo eyikakangirirya yithi thukatholera eryikiiriirya Yesu kristo.
7. Amasako akabuugha kyi okwabo abthekiriraya Kristo.
8. Omundu atholere inyikirirya Kristo yo bungahi?
9. Eririgha omo muthima ghuthi Kristo ni mughalha wa Nyamuhanga kyisa kyikaghunza? Kyamabya isiko biri bithya, busana naki?

10. Thonda emilhondo eyikabuugha oko bwowa omo Kristo.
11. Abandu bosì abèbisomo banemwendisyalhama?
12. Engangirirya eyikabuugha yithi “eryikirirya lisa” ni yahi?
13. Soma Yakobo 2 wanaghanirya oko mwatsi eyirimo.
14. Hohana 3:6 yikanakangirirya “eryikirirya lisa”?
15. Omundu amabya inyikirirye omo Kristo, akatholera inyakolha kyi?
16. Thukalhusibawako olhubanza erilhaba omwikirirya?
17. Biblia yikakangirirya eryikirirya erya musiindo wahi?
18. Thwangalenga thuthi eryikirirya lyethu?
19. Eryikirirya kikasa lithi?
20. Likalholhaya omundu yokwikolha kyi?
21. Eryikirirya lyanganabuulya oko bihano by’omukama?
22. Mariko 16:16. Thonda emyatsi eyiri aho.
23. Omo by’erilhangirirako by’eriyisubamo waminyereremo kyahi?
24. Abandu mubakolha omughulhu bikiriraya?
25. Hali eryikiiriirya lingahi?
26. Eryikirirya lyethu likathukolhaya okwikolha kyi?

Eky’eryigha 7

Riyisubamo Oko Bibi

Erindi ilhaghira ly’Engulhu Yowenely’eriyisubamu. Niikwa eriyisubamu nikyi, liwithe buhugho bwahi n’olhuholho, eritsikwa n’erilhubuka lya Kristo. Oko nzuuko, ekyiinywa eriyisubamu kyikamiinyiisaya erithasya binduka, erighenda

omo yindi nzira, erihinduka, erireka erikolha ebibi kandi ebithere. Kyiro kighuma Yesu mwathuulha olhughano olhukakanganya ebithukakanayako bino. Mwabuugha athi, “Niikwa mukaghaniraya muthi kwehi? Omundu abya n’abaghalha babiri, neryo mwahika oko w’erimbere athi, Mwana, ughende ukole omwirima ly’ebinyu munabwire. Neryo omwana oyo mwamusubirya athi, Sinyanzire, niikwa enyuma mwabinduka, mwayayo. Neryo Thatha oyo mwasa oko mwana w’akabiri, mwamubwira ngoko abwira oghundi. Niikwa omwana mwamusubirya athi, Egha Mukama, niikwa mwathaghenda omwirima. Oko babiri abo, nindi wakolha erisonda lya thatha wiwe kwehi? Mubabuugha bathi, ow’erimbere. Neryo Yesu mwabuugha nabo athi, Kwenene ngabuugha nenyu, nyithi, abasolesya n’abamalaya basyabathanga omo bwami bwa Nyamuhanga. Kusangwa Yoane mwabahikako omo nzira y’erithunganene, nenyu mumuthamwikiiriirya, niikwa Abasolesya n’abamalaya mubamwikirirya. Nenyu nomo mwana lhangira muthya, mumuthabinduka erireka ebibi, mukamwikirirya”. (Matayo 21:28-32). Neryo oko buhugho n’olhuholho, eritsikwa, n’erilhubuka lya Yesu, omundu akabya amabinduka erilhwa oko bibi byiwe kyikabya kaminyikalho k’olhuholho lhw’omukama. Kobiri bithya omo by’erilhangirirako ebibiri, thukalhangira ngoko eriyisubamo ni kyindu kyikulhu.

Eriminya ngoko omundu ni mubiihya (Baroma 3:23), kandi n’obuhingyi bw’ekyibi ni lhuholho (Baroma 6:23), Yesu ko akangiriraya athya, athi omundu akatholera inyayisubamu kutse inyasyahera (Luke 13:3). Erithasyahomera ndeke oko nzumwa eyi, mwaswasuba omo mulhondo oyu omo

Luka 13:5. Omo bindi biinywa, abya inyakabuugha athi omundu inyanalya-yisubamu. Kutse eribinduka akalhwa oko bikamuheraya, inyakendisya hera. Kandi mwathasya buugha athi, *“Ngababwira nyithi lithya obutseme bunene bwasyabya elubulha busana nòmukolha nabi mughuma oyukabindula omuthima n’erireka ebibi kwilhaba obutseme busana n’abandu bathunganene amakuumi mwenda n’omwenda abathe n’obwagha bw’eribindulha emithima n’erireka ebibi”* (Luka 15:7). Muminye kyino, nomo kyine kyithi eriyisubamo lilhabire okwiyowa nabi busana n’ebibi. Omundu anganayowa nabi kusangwa mwakahambawa neryo amayisanga inyabirithwalhwa omo mulikiyi. Anganayowa nabi busana akolire nabi, niikwa busana n’eririhira ekyalyakolha. Eri syiyisubamu. Omukwenda Paulo akathubwira athi, *“Kusangwa obulighe obo Nyamuhanga akaliigha busana nethu bukalettha eribindulha emithima, n’eribana erilhama erithawithe erithaswa-tsomana. Niikwa obulighe bw’ekyihugho bukalettha erilhama”* (2 Korinto 7:10). Eriyiswekera ery’obwanyamuhanga likaletha eriyisubamu niikwa isiryathwalibawa nabi ghuthi lyamaminyiisya eriyisubamu.

Oyutholere eriyisubamu nindi? Paulo abere athuulira abandu inyane oko kyithwa kya Mara, akayaghunzerera eky’eryigha kyiwe, mwabuugha athi, *“Nyamuhanga abirikyiruukya ameso oko meghulhu abandu babya sibali baminya, niikwa lino akahana abandu bosi, ehosi, bangabindulha emithima yabo erireka ebibi”* (Emiibiiri 17:30). Neryo erikwamana nekyi, omukama akasonda mundu ghosi ehosi inyaleka ebibi kutse eribinduka oko bibi. Kandi ghuminerere ngoko omo mughulhu mulebe Nyamuhanga anganabya imwathaleghana eribiihya lyethu

busana n'obuthaminyanya bwethu, niikwa akakyikangananya ndeke athi syendisasya kyirukya amweso w'ekyibi nomokyangabya ikyakolhawa omo buthaminyanya kutse eyihi. Kandi, omukwenda Petero akabuugha athi, *“Obuli mundu oyukabuthawa na Nyamuhanga syalikolha ebibi, kusangwa awithe obwa Nyamuhanga emwisi wiwe”* (2 Petero 3:9).

Omwikania oko byosi ebihambire okwiyisubamu, amasako akakangananya abandu aba eribya ini bandu kutse ababiri biihya. Omo mukabya isimuli bana kutse esyamekeke kusangwa *“obwami bw'elhubulhanibw'abali ngaba”* (Matayo 18: 1-3). Uminye uthi Engulhu Yoweneyisamalire abandu abakulire abangana-yithwiramo eriyisubamo, ekyo kyikaminyisaya kyithi bakabya ibanasi kubakanakolha ebibi kandi ibanza eribinduka. Abo basa ababirihika oko myaka y'erighanzirwa ebyabo bobangana yisubamu.

Lithya, thwamasuba omo Emiibiiri 2, thukasangana Petero n'abakwenda ibanemuthuulira oko kyiyo kya Pentekote. Babya bakathuulira oko babihya, okwabo ababyayitsungira omwibamba Yesu nibya. Kyabya kyindu ekyikabya ikyineho, nokweryo, babere banza eriminyanya ingibakolha kyi, Petero eribuugha nabo, *“Mubindule emithima yenyu, muleke ebibi, kandi obuli mundu abatisibawe omo liina lya Yesu Kristo busana n'eribuyirwa ly'ebibi byenyu, neryo mwasyabana olhusuunzo lwa Nyamuhanga y'omuliimu Abuyirire”*. (Emiibiiri 2:38). Enyuma waho, omo lindi ithuulira, mwabuugha athi, *“Neryo inywe mubindul emithima yenyu, mulholhay'eyo eyiri Nyamuhanga, ebibi byenyu bisangulhawe”* (Emiibiiri 3:19).

Erilhaba omo milhondo eyi y'amasako, kyikalhangirika ndeke ngoko eriyisubamu nilhaghira ly'engungulhu mbuya. Ekyi kyikaminyisaya kyithi obuli mundi akathekawa eribinduka n'erilhwa omo bibi amabya inyanzire eryolhbera omukama n'eribana ebibi byiwe bikasangulhwa. Oghundi musiendo w'erikangya oko mwatsi oyu, sihali oyuwangalhamiibwa neryo akaghenda elhubulha isyathayisubamu ebibi byiwe. Engebe eyuwene omo mitse sikirighunza. Sihali ikyangasuba omo kitswa ky'ekyo omukama abiribuugha athi omundu akathekawa, imwathunga omulhamo.

Thwamasoma omo kitabu ky'Emiibiiri y'abakwenda n'risamalira esyonzira sy'abandi abiriyisubamu, ghukendilhangira ghuthi eriyisubamou kulilhaghirwa, nelyo imulyakoleka. Ekyarilhangirir'ako Emiibiiri 16, omughulhu Paulo na Sila babya ibamabirikangirirya ekyiinywaky'omukama oko Musiriakani hayiima neka yiwe, kyikabuugha kyithi mwabathwalha n'eriyeerya esyangyimba syabu. Ekyi lyamabya isiryaby'isubamu, ekyabya kyi? Omo ky'erileberyako kya Saulo, erikwamana na 9, abya ini mundu oyukendereraya abikirirya, niikwa omughulhu omukama amubanikira mwabya mundu w'engabane. Mwakwamikyaghenda n'eryikirirya engulhu, niikwa erkangiorirya abandu bo Kristo n'eribambwa liwe, oyo oywabya inyakaghanaya kutsibu iywakatsuuka nayo. Ekyi siyisubamu?

Omundu mwabuugha athi, omwolhobera Engulhu Yowenehakabya eribinduka omo muthima, ekyikaletawa eryikiriirya, n'eribinduka omo mibere, ekyikalhuua omwibatisibwa. Omwiyisubamo n'eryolhobera Kristo, ebibi

by'omundu ebyosi bikabuyirawa kutse bikasangulhawa. Omundu akabya kyihangika kyihya-kyihya (2 Korinto 5:17), omundu muhya-muhyo omo Kristo (Galatia 3:26,27). Ebindu ebyabya akakolha, syalisyakolh'abyo. Ebindu ebyabya akaghania, lino akabyanza. Sihali kyindu ekyisosire ngekyi omo ngebe y'omo kyihugho.

Omundu akabya amabiribya mwikirirya akabya inyakanathunga endambi eyakathasya-yisubamu kandi. Omwikirirya syalibya inyathunganene. Nomo anabya omwikirirya omuyiketherwa nayo akanathalhuka. Abo abakabiihaya omwighenderera bakatholera ibayisubamu ebibi byabu neryo ibasaba Nyamuhanga eribabuyira (Yakobo 5:16; Emiibiiri 8:22). Bithe bithya ibakendisyahera.

Niikwa okwabo abathe babya bikirirya, kandi nabo abathe babya banyakanisa, bakatholera eryowa Kristo, ibamwikirirya, ibayisubamu oko bibi byabu, ibasobolha bathi Kristo ni mughalha wa Nyamuhanga, neryo ibabatisibwa busana n'erisangulhwako amalholho. Obuli ilhaghira okw'ebi ni kyindu kyikulhu, omundu syangalhama ahathe ekyighuma ky'okubyo aho ebindi bithe. N'omundu syangalhamiibwa ekyighuma kyitheho. Ng'erilhangirirako, kyikamiinyiisaya kyithi omundu awithe erireka obuli kyibi, n'erithalhuka, nomo kyangabya ibiri omo kisomo, ibyabya ibiri omo ngebe yiwe, nimo angathoka erilholya embere n'obwowa. Omwikolha athya lisa nimo angabuugha athi abiryolhobera erilhaghira ly'eriyisubamu.

Ebibuulyo

1. Ghaniraya okwiyisubamu nga nikiyi.
2. Olhuholho, eritsikwa, n'erilhubuka, biwithe mwatsi wahi?
3. Omundu athondekire omo musindo kyi?
4. Soma Luka 13:3.
5. Omundu amathalhuka eriyisubamo akakwa kyi?
6. Nindi oyukatsema hamabya eriyisumu ly'omundu?
7. Eriyisubamu lyanganakaniibwako ng'omundu erithayowa isyathanza ekyabirikolha nabi?
8. Thonda eriswekera omo bwa Nyamuhanga nga kyikamiinyisaya kyi?
9. Nindi oyutholere eriyisubamu?
10. Soma 2Petero 3:9 wanathonda ngani mwatsi wahi owaly'aho.
11. Abaana banganayisubamu?
12. Engulhu Yowene yikalholeribawa eyiri bahi?
13. Ghaniraya okwiyisubamu ngo likakangiribawa omo Emiibiiri 2:38 na Emiibiiri 3:19.
14. Eriyisubamu linathondirwe ng'ekyighuma okw'ilhayira ly'engulhu Yowene?
15. Omundu anganaghenda elhubulha busana n'emitse mibuya misa?
16. Kanganaya ngoko eriyisubamu likakangiribawa omo Emiibiiri 16 n'omu Emiibiiri 9.
17. Eriyisubamu lyangalettha lithi eribinduka omo ngebe?
18. omundu amabirikiriirya akanathasyayisunza eriyisubamu?

Eky'eryigha 8

Eriyisinga Kristo

Erindi erilghira ery'Engulhu Yowenely'erisobolha ghuthi Kristo ni mughalha wa Nyamuhanga. Ekyiinywa “erisinga” kyikaminyisaya erithuulha omwatsi ghuthi aminyawwe, erithuulhughania, eriminyerera. Erikangania eryikirirya lyaghu om'oghundi mundu. Ekyi ky'omukama akasonda ok'obuli mundu oyukamwolhobera. Omundu akatholera inyabya inyanayisunzire eriminywa ngoko akikiriraya Kristo ko ni mughalha wa Nyamuhanga amabya isyanzire eribuugh'ighuma athya, kyikaminyisaya ngoko syayitheka-thehire eryobera omukama, kandi syangolhobera omukama omo mibere yiwe eyo.

Yesu mwakangirirya obukulhu bw'eriyisinga bu omughulhu abuugha athi, “*Obuli mundu oyukanyikanganaya embere sy'abandu, naghe nasyamukangania embere sya Thatha waghe oyuli elubulha. Niikwa oyukanyighana embere sy'abandu, neryo naghe nasyamughana embere sya Thatha waghe oyuli elubulha*”. (Matayo 10:32,33). Muiyire thuminyerera ebindu bike ahiikwa:

1. Abosi bakabirikirawa eriyisinga Kristo. Si kyikulhu nyani bandu kyi, okwenene oku kulhangirikire.
2. Eriyisinga likatholera eryabya ini Kristo, butsira omundu oko bibi bwiwe. Eky'erimbere omukama akasonda eriyisinga eribya ahisi sy'obuthokyi bwiwe, neryo inyanakolha oko bibi

by'omundu oyo.

3. Eriyisnga eri likatholera eryabya embere sy'abandu. Hakatholera ibabya abimiiri b'omwatsi oyu. Omundu amabya kwenne inyakikiriraya Kristo anganzire abandi kutsi obuli mundu inyaminya eryikirirya lyiwe eryawithe omo Kristo.

4. Y'omundu mughuma oyo oyukanza eriyisinga Kristo yanoyo Kristo eyilhagha erisyakangania embere sya Thatha wiwe oyuli elubulha. Thaghanirya oko mighisa, n'ekyitsumbi, eky'erithunga Omughalha wa Nyamuhanga erimuyisinga embere sya Thatha wiwe elhubulha. Ekyolho-kyolho erimuyisinga embere sy'abandu.

5. Abakaghana erimuyisinga embere sy'abandu bakesyaghaniwa embere sya Thatha wiweoyuli elhubulha. Niikwa sibuugha ambu ly'eritahaghana erimuyisinga embere sy'abandu, niikwa bakamughana, nokweryo akendisya bakolhako kokyikathokekana. Ikyaneyo kyikakolesibawa ishali thlererya nga nibahi kutse ngabakwalhwa hayi. Neryo omo bihandi bibiri byomo masako ebikuuhi, bingyi byabiribuwa. Omukama akakanganaya esyambande ebiri, emighisa n'ebyangalhwamo, n'okwabo abakendisyamughana. Endambi iyane nguma akabirekera obuli mundu eriyisombolera.

Neryo byasyabya bithi okwabo abathendisayisinga Kristo? Omukwenda Yoane mwabuugha athi, "kusangwa bagenda omo lugendo omo muubiirii wa Kristo, kandi abatiikiiriirye sibatahabo ekindu ky'eriwatiikyabo." (2 Yoane 7). Omwatsi ali athi okwabo ab'eriyisinga omukama, Paulo akasakanga binu,

“obuli mundu asyathuulhughania ko Yesu Kristo ni mukama, busana n’eriha olhukengerwa oko Nyamuhanga Thatha” (Filipi 2:11).

Embere waho, thukalhangira ngoko eriyisubamo eri siry’eribyaho omo buno buyira, niikwa likabyaho erihika oko mulhamo. Ghuminyerere; “Kusangwa wamakangya omo buno ko Yesu ni mukama, kandi wamiikiiriirya omo mutima wawe ko Nyamuhanga amuluubuukaya oko baholi, iwalamiibwa. Kusangwa omundu amiikiiriirya omo mutima wiwe busana n’erituungananiibwa na Nyamuhanga , kandi akatuulago omo buno bwiwe, inialamibwa.” (Baroma 10:9-10). Abandi babiri-bughirira n’erilengekania bathi omundu eribana omulhamo, eky’omundu angakolha ly’eriyisinga ebibi bwiwe n’eriminya omukama, ambu neryo ibyamahwa. Neryo erikirirya iryamakolha wahi? Niikwa omundu akalhairaya athi eriyisinga liseghemire okwikiriirya. Neryo eriyisubamo ni kuthi? Sihali ebikakaniibaw’ako okwikiriirya hano. Neryo abakasonda eribana enzira eyanguhiire, omughulhu omunene bakakyirukaya ameso wabo w’ebindu bingyi. Niikwa omulhondo awaka-kwamako akakanganaya ngoko eryikirirya n’eriyisinga Kristo ibikahiikana omo ndekatheka sy’omulhamo. Eky’erimbere, akakanganaya ngoko omundu awithe eryikirirya omo muthima wiwe, niikwa ni busana n’erithunganene kutse omwilhamiibwa. Ni bugha ambu, omundu syangalhamibawa, niikwa akasondekanaya omulhamo. Eky’akabiri, akakanganaya ngoko eriyisinga omo buno, likakolhaya okwilhamiibwa. Eriyisinga ghuthi Kristo ni mughalha wa Nyamuhanga kandi akalhamaya, niikwa isiminya bughira ghuthi akalhamaya. Ekyi sikyighumera. Omo

myatsi eyindi, eryikirirya omo Kristo n'eryisinga ghuthi Kristo ni mughalha wa Nyamuhanga, sikyirighunza okwikulethera omulhamo. Omundu syangalhamiibwa eryikirirya litheho hayiima n'eryisinga, niikwa hali bingyi ebikatholera erikolhwa. Omwighunzera, thuwithe eky'erilhangirirako omughulhu omulhume abya w'erikolha eriyisinga, athi kyangamuthokesya eribatiisiibwa. Thusome olhughano olho: "Niikwa omuulaika w'omukama mwabuuga na Fiilipo athi, uhangane, ughende oko kytambi ky'eyiikwa oko nzira eyikandagalha yikaluaa eYerusalem ariya eGaza. Eyi ni nzira y'embwarara. Neryo Fiilipo mwahangana mwayayo. Neryo habya omundu oyuubuuniire ow'eEtiopiia, iniakasuba ewabo. Omundu oyo abya mundu mukulhu oyukabika ebindu byosii by'omwami-kalii ye Kandake w'etiopia. Kandi abya iniayire eYerusalem eriyaramya Nyamuhanga, iniakasuba eTopia omo gali yiwe. Omughulhu abya akaghenda omo gali yiwe eyo, abya akasoma omo kitabu eky'omuminyereri Isaya. Neryo Omulimu Abuyirire mwabwira Filipino athi ughende, uyithomeke oko gali eyo neryo Filipino mwathibibithaa eyali, niikwa mwowa akasoma ekitabu eky'omuminyereri Isaya, neryo mwabuulya athi, ko nangaminyanya nyithi ndawithe oyukanyowisaya byo kwehi? Neryo mwabuulya Filipino athi asambire oko gali n'eryikalha nayo. Niikwa omulhondo w'amasako owo abya akasoma waya, athi, abya ng'embuuli ayithwalhawa eriyakerwa, abya ng'ekyana ky'embuuli ekyikalhaba bukuthu omughulhu bakathwa obweya bwakyo. Mwathahabuugha kyiinywa n'ekyighuma kandi mwahemulhwa kandi mubamukagha eribanza. Nindi wasyathuulha omwatsi w'abana bawe kwehi? Kusangwa engebe yawe omo kyihughu yabirilhuusiibwaho. Neryo omukulhu oyo mwabuugha na Filipino athi ghunyibwire

omuminyereri ng'akahulha ndi. Akayahulha kutse akahulha ghundi kwehi? Neryo Filipo mwatsuka oko mulhondo w'amasako, mwamuthuulira engulhu Yowene ya Yesu neryo babere bakaghenda omo nzira eyo, mubahiika ahabya amaghetse, neryo omukulhu oyo mwabuugha athi, lebaya, hano hali amaghetse! Ekyanganyikakirya eribatisibwa ni kyahayi kwehi? Neryo Filipo mwabuugha nayo athi, wangabatisibwa wamiikiiriirya n'omuthima wawe ghosi. Naye mwasuubirya athi, namikiiriirya ko Yesu Kristo ni mughalha wa Nyamuhanga. Neryo mwahamulha athi egali yihangane, neryo ababiri boshi, Filipo n'omukulhu oyo, mubandaghalira omo maghetse neryo Filipo mwamubatiisya. Neryo omughulhu balhuua omo maghetse, omuliimu w'omukama mwabakulha Filipo n'omukulhu oyo mwathaswamulholhako, niikwa mwaya omo lhughendo lhuwe inyatsumwirwe ndeke". Emiibiiri 8:26-39). Hano kyikalhangirikandeki ikyabya kyabere. Filipo mwakangirirya omulhume ono ebihambire oko Yesu n'ebya atholere erikolha akamwolhobera. Neryo abere abiriminya oko Mukama mwanza erighendera okwosonda liwe. Niikwa ghuminye ghuthi, eribatisibwa lithe ryabya, mwanza eriminya ngabya inyamabiriikiiriirya athi yesu ni mughalha wa Nyamuhanga. Omukonwa mwasubirya athi inga, niikwa ekyi kyabya liinyuma inyanalighire eriyamubatisya.

Biri okwikwamana n'ekyerilhangirirako ekyi, kandi n'erikwamana n'eyindi milhondo yomo masako eyikakanaya okw'iyisinga Kristo, eyikakananaya yithi thuthethwabatiisya omundu wahi thukabuulhaya nganamikyiriirya athi Yesu Kristo ni mughalha wa Nyamuhanga. Amabiri liigha, neryo ithwaghenda embere n'eriyamubatiisya.

Eriyisinga eriyinga eri lyolikakanibawako n'eriyinga erYowene, kandi ihali eriyisinga erihikire, lyangabya iry'eriri ngeri.

Neryo thuwithe kyi, omundu erilhamiibwa akatholera inyahulikirira engulhu mbuya, inyikiiriiryayo, inyayisubamo, inyayisinga athi Kristo ni mughalha wa Nyamuhanga, neryo inyabatisibwa busana n'erisangulhw'ako ebibi biwe. Eriyisinga Kristo omo musindo oyu ni kyihandi kyighuma ky'oko ndeka-theka y'omulhamo kutse nikiyighuma oko bilhayiro by'engulhu mbuya. Ekyo kyisa sikyangalhamya mundu, niikwa nakyo kyitheho sihali mundu wangalhama. Kokyiri kyithya kyikulhu eky'amaka omughulhu kyikathekawa omo mwanya ow'omukama akyithek'amo.

Ebibuulyo

1. Ghaniraya oko kyiinywa "eriyisinga"
2. Omundu akatholera inyathonda kyi erihulhw'amo mwana wa Nyamuhanga?
3. Soma Matayo 10:32,33 wanakania oko mwatsi oawliyo.
4. Nindi oyukabirikirawa eryasa yisinga Kristo?
5. Eriyisinga eri likatholera iryabya hayi?
6. Neryo omukama akakolha kyi busana n'erimuyisinga?
7. Byasabya bithi oko bakaghana erimuyisinga?
8. Erisinga eri likakolhawa lithi?
9. Eriyisinga eryingira omo mulhalhamo kutse eriyisinga eryikiirirya omulhamo, engabane niyahi?
10. Filipo ayisunza Omukonwa akolekyi, athe amubatisya?
11. Ayisinga mughulhu wahi? Ayisinga bihi?

12. Busana nakyi eriyisinga eri lyabya litholere iryatsuuka eribaho?
13. Thunawithe obwiranda erisonda omundu atsuuke eriyisinga omu
14. Eriyisinga eri omughulhu omenene likahulhawa omo lina lyahi?
15. Thonda endeka-theka y'omulhamo.

Eky'eryigha 9

Eribatiisibwa busana n'eriisangulha kw'ebibi

Omwatsi w'eribatiisibwa alinga w'omwatsi akalire owathikengawa ndeke omo by'eryigha ebindi. Kandi nibya ni ky'eryigha ky'omo Biblia, kyighuma oko ilhaghira ly'engulhu mbuya. S'ibuugha ambu ky'okyikulhu oko bindi bilhaghiro, niikwa endambi iyan'enguma nakyo siky'erilhabibwamo ameso ngoko ebindi bine. Sihali kyihano kyighuma ekyikalhamaya, niikwa ni kya bwowa erikwama erilhaghira eryosi ebikaletha omulhamo ow'obuli mundu akasonda.

Omo ky'eryigha kyino thukanza eryigha bingyo okw'ibatiisibwa. Thukenditsuuka n'erisondekania ekyo eribatiisibwa likamiinyisaya. Ekyi kyinanguhire. Ekyiinywa ekyi kyikalhwa omo kyiinywa ky'eGuriki ekyikabuugha kyithi baptizo kandi kyikamiinyisaya eryibiika, eriswika, eryongobererya kutse eritsika. Amasako syalilhwa n'ekyi. Muhulikire: "Simwesi kwehi? Ithwebosi ng'oko thwabatisibawa erimathikana na

Kristo ithwabiribatisibwa erimathana n'olhuholho lhwewe kwehi? Neryo omo lubatiso lhwethu thwabirithabwa haghuma na Kristo omo luholho lhwewe, neryo ng'oko Kristo alhuhukibawa oko baholi omulhukengerwa lhwa Thatha, lithya nethu itwathoka erighendera omo mibire ey'engebe nyihya-nyihya" (Baroma 6:3,4). "Kusangwa omwibatisibwa lyenyu muthwathabwa haghuma na Kristo. Kandi omwibatisibwa lyethu, mwalhubukibawa haghuma na Kristo busana n'erikirirya lyenyu omo buthokyi bwa Nyamuhanga, obwalhubukaya Kristo ok'olhuholho (Kolosai 2:12). Niikwa biri bithi okwitsatsanga kutse eryuth'ako amaghetse? Ebibikatholera ebyaghuswa hali ng'Emiibiiri y'abandi. Byahirawaho erisuba omo kyitswa ky'eryibiika. Abasikaya Nyamuhanga sibangabanika mwebyo.

Emyatsi eyindi, thukasoma omo Biblia mo eribatiisya lithe rya musindo mighuma, oko luhandi olhundi, Paulo mwasakanga omo Efeso 4:5 athi hali lhubatiiso lhughuma. Lithya ni lhwahi kwehi olhutholere omughulhu ono? Thwamasuba omo Emiibiiri y'abakwenda 8:26-39, thukasoma oko lhughano lhwa Filipo n'omukonwa. Filipo abere abirikangirirya omulhume ono yoko Yesu n'erisonda liwe, mwayisuunza eribatiisiibwa. Amasako akabuugha athi, "neryo babere bakandaghalha, mubasangana amaghetse. Neryo omukonwa mwabuugha athi, lebaya hano hane amaghetse. Ekyanganyikakirya eribatiisiibwa ni kyahi kwehi? Neryo Filipo mwabuugha athi, ngikiririaya nyithi Yesu Kristo ni mmughalha wa Nyamuhanga. Neryo mwalhaghira egali yiwe eryiimana. Neryo Filipo n'omukonwa mubandalhira oko maghetse, neryo mwamubatiisya" Lithya

thulebaye ebindi bike:

1.Eribatiisya mulyasa ng'ekyikaghunzerera ok'obwowa oko Mukama.

2.Ly'eritsika, kandi eritsikwa omo maghetse oko ndambi eyo. Neryo ekyo kikahwer'aho.

3.Niikwa aho sihangabere mwanya w'erikakalikana omwiminya ekyindu ekyi ngakyikaminyisaya kyi. Ebisakirwe bikabuugha bithi abosi mubandaghalira omo maghetse, kandi erithasyakihika ok'omwisi ko ndeke, ekyikabuughawa ekyi kyikakaniibawa oko Filipo n'omukonwa. Erihomera ndeke enzumwa eyi, kyikabuughawa ambu babere babiribatiisya abosi mubalhuua omo maghetse. Oyuwangathalhuka erikenga ekyi nindi? Omo kwenene sihali mundu wangikirirya ekyiinywa ky'omukama ngoko kyine.

Neryo thwamasuba omo Yoane 3:3,5, thukowa amasako akabuugha; "Yesu mwasuubirya athi, kwenene, kwenene, ngabuugha nenyu, nyithi, omundu amathendibatiisiibwa kandi, syangathoka erilholha oko bwami bwa Nyamuhanga. Nikodemo mwabuulya Yesu athi, k'omundu angathoka eributhwa athi, amabya mukulhu kwehi? Angathoka eryingira omonda ya koyo n'eriswabuthwa kwehi? Yesu mwamusuubirya athi, *"kwenene, kwenene, ngakubwira nyithi, omundu amathendibuthwa oko maghetse n'oko mulimu, syangathoka eryingira omo bwami bwa Nyamuhanga"*. Neryo ni lhumimbi lhwahi olho amagheste akakolha omwilhama ly'omundu? Ekyi kyanguhire, kyikahamba okw'ibatiisiibwa, kandi ekyo lino kyithusamalire. Omundu akaghunza kandi, erilhaba omo lhubatiiso, omulimu akamulhabya omo masako. (1Petero

1:23). Thukaminyanga ngoko ebi bikakwamana n'amasako nga 1 Korinto 12:13; Baroma 6:3-4) n'ebindi, ekyi kyikathubwira kyithi erikolha ekyi likahira omundu y'omobwami bwa Nyamuhanga kutse omo Kanisa ya Kristo.

Kandi Paulo akasakangira Tito, “*Nyamuhanga mwathulhamya. Si busana n'Emiibiiri yithunganene thwakolha, niikwa busana n'erighanyira liwe, omulimu abuyirire inyakathweraya, kandi akathubutha buhya-buhya, n'erithuha engebe nyihya-nyihya*”. (Tito 3:5). Eryeriibwa n'erithasya-buthwa, hano, likakanaya oko maghetse w'olhubatiiso, ekyi kyakakanay'ako ikyo kyenekyene. Olhubatiiso ni itsikwa; niikwa omo maghetse; eryo libatiisibwa eryo amasako akasiikaya omo mughulhu ono.

Thukalhangira obukulhu bw'olhubatiso omughulhu thukasoma emilhondo minene eyikathubwira ekyo lhukakolha. Ng'ekyerilhangirirako, lhukalhamaya, “*omwatsi oyo nikyisosekanio ky'obubatiso busana n'erilhama lyenyu. Eribatiisya silhusya lyemitindu y'omubiri, niikwa n'ilhagha Nyamuhanga omo bunyamuthima buwene, erilhamiibwa busana n'erilhubuka lya Yesu Kristo*”. (1Petero 3:21). Omukwenda syalibuugha athi olhubatiiso lhusa lhw'olhukalhamaya, niikwa lhukalhamaya lhwamakwamwa omukama inyanemukangirirya ekyiinywa kyiwe. Niikwa kandi, Kristo akabuugha, “*Oyukiriraya akandi inyabatisibwa asyalhamiibwa niikwa oyuthikirirya asyasiingwa*” (Mariko 16:16). Olhubatiso lhukalhamaya mughulhu wahi? Omughulhu omundu akabya amikirirya neryo akabatiisibwa. Erighana ekyi ghukabya iwamaghana Kristo.

Erilholya embere, eribatiisibwa ly'erisangulhw'ako ebibi.

“Petero mwabwirabo athi, mubindule emithima yenyu muleke ebibi, kandi obuli mundu abatiuisiibawe omo liina llya Yesu Kristo busana n’eribuyirwa ly’ebibi byenyu, neryo mwasyabana olhusuunzo lhwa Nyamuhanga y’omuliimu abuyirire” (Emiibiiri 2:38). Saulo mwabirwa eribatiisiibwa ebibi byiwe imobyasangulhwa. Hulikirira; *“Nalino, ukalinda busana nakyi kwehi? Hangana, ubatisibawe, kandi ulhakire eriina lyiwe, ebibi byenyu by’eribawe”* (Emiibiiri 22:16). Kandi, nilhayira ly’omukama; *“Neryo Petero mwahangana athi babatiisiibawa omo liina lya Yesu Kirsto. Neryyo mubabuulya Petero bathi ikale nabo ebindi biro”* (Emiibiiri 10:48).

Erilhamiibwa aho lithe, erisangulha ebibi, n’ebindi, ly’erilhaba omo bw’owa obu, omundu akayiithuunda oko omusasi wa Kristo, owakathokesya omundu erisangulhwa kw’ebibi. Thuwithe Matayo 26:28 hakabuugha hathi omusasi wa Kristo mwuthika busana n’erilhuusiibwako ebibi. Niikwa Petero abere abwira abandu oko kyiyo kya Pentekote, athi, bamasonda erilhusiibwako ebibi bakatholera eriyisubamo neryo ibabatiisiibwa, neryo kyikamiinyisaya kyithi eryolhobera erilhayira erike eri, omundu akayiithuunda oko musasi wa Kristo neryo inyathunga eribuyirwa ebibi, niikwa iyo Saulo mwabwirwa ambu ebibi byiwe alighe by’eribawe, kutse eribuyirwa, ekyabya ikyikayitsutsawa imwabatiisiibwa. Nokweryo, kyilhangirikire ndeke ngoko erilhaba omwibatiisiibwa, omundu akayithuunda oko musasi wa Kristo owakeraya ebibi. Ni kwenene, omo Baroma 6, thukabwirawa ngoko thukabatiisiibawa omo lhuholho lhwa Kristo, ekyikamiinyisaya kyithi erilhaba omo bw’owa okw’ilhaghira ly’omukama, thukahika ok’obihembo eby’olhuholho lhwa

Kristo, thukabuyirwa ebibi.

Thukalholya embere, thukabirwa ambu erilhaba omo lhubatiiso, thukingira omo Kristo. Paulo mwasakangira aba Galatia athi, *“Kusangawa busana n’eryikirirya, inywe bosi muli baghalha ba Nyamuhanga, n’erimathikana na Yesu Kristo. Kusangwa enywebosi mwabatisiibawa erimathikana na Kristo mwabiry’ambalha emibere ya Kristo”* (Galatia 3:26.27).

Kandi, ni kyerisingika ndeke ngoko eribatiisiibwa lisa siririlhamaya kandi siryanga lhamya. niikwa nibya omundu syangalhamiibwa athatabatiisiibwa. Sihali erikangirirya omo masako erikabuugha lithi omundu anganalhamibwa neryo hanyuuma inyanabatisibwa. Omundu isyaminya eribatiisiibwa nga nikyi niikwa inyamikya ekyilhubirirwa kyalyo. Omundu anganabya inyabiikwa ngendo ikuumi nibiiri niikwa amabya isyalyatha luubbwa busana n’ekyilhubirirwa ekyitholere, akabya isyatha batiisiibwa amasako kw’akabuugha. Hali eribatiisiibwa lighuma kandi eritholere eribya eryero lisa eryl Biblia, likatholera iryabya ery’eritsikwa omo maghetse, busana n’erisangulhwako ebibi, nerihira omundu y’omo Kanisa eyo thukasomako omo Biblia. Bithe bithya in’isekererya lisa. Niikwa eribatiisiibwa likalhamaya mughulhu wahi? Omughulhu omundu akowa Engulhu Yowene ya Kristo ey’enzongole, iniikiriry’ayo, inyayisubamo omo kwenene, inyayisinga athi Kristo ni mughalha wa Nyamuhanga, kandi inyabiribatiisiibwa erikwamana n’amasako. Omughulhu oyo kandi omo mibere eyo misa nimo eribatiisiibwa lyangalhamya. Omo mwatsi eyinga, ni buugha ambu w’omubiiri owakaghunzerera omo bw’owa owakakanganaya omundu erilluua eyiihya ya Kristo

eryingira omo kathi kiwe. Ekyi ky'ekyisandu ekyikaghunzerera, omo mukolholho w'eribbasulha owakakolhaya omundu yoko Kristo n'ekanisa yiwe.

Erighunzerera, erilhaba omo mukonga w'eribatisiibwa omundu akatsikawa n'omukama omo maghetse w'olhubatiiso n'erilhubukiibwa omo maghetse w'olhubatiiso eribbasulira omo ngebe nyihya-nyihya. Ekyi ni kyutsutsu ky'amatsiko wa Yesu n'erilhubukiibwa lyiwe. Ni kwenene, sihali wangathomekera ok'byomukama ghukasonda eryuwanina oko nzira yiwe. Soma Baroma 6.

Ebibuulyo

1. Ni ky'erigha kyahi ekyikalettha obuhaka omo Biblia? Busana nakyi?
2. Eribatisiibwa nilhayira ly'engulhu mbuya?
3. Nina ilhaghira likulhu kwilhaba awandi mathegheko awali omo ngulgu mbuya?
4. Erilhaghira lighuma lyanalhamya?
5. Thakania oko kyiinywa Baptizo.
6. Baroma 6:3,4 na Kolosai 2:12 bikakkangiriraya kyi?
7. Eritsatsanga n'eryuthangirira bikamiinyiisaya kyi?
8. Hali eribatisiisya lingahi?
9. Eribatisiisya lighuma eryomo Biblia ni ryahi?
10. Soma Emiibiiri y'abakwenda 8:26-39 wanaghanirya kukyo.
11. Omukonwa mwatsikwa omo kyi?
12. Yoane 3:3-5 akakangiriraya athikiyi okwitsika?
13. Eryerya busana n'eributhwa buhya kyikaminyiisaya kyi?
14. Thonda eribatisiibwa nga likakolha kyi.

15. Eribatisiibwa likanalhamaya?
16. Thonda ebiri omo Mariko 16:16.
17. Omundu akatholera inyakolha kyi ebibi byiwe imo byasangulhwa?
18. Eribatiisiibwa mulyanalhaghirwa?
19. Omundu akayithuunda athi oko musasi wa Kristo?
20. Ghaniraya oko Matayo 26:28 na Emiibiiri y'abakwenda 2:38.
21. Thasya ghaniraya oko Efeso 1:7 na Emibiiri 22:16.
22. Eribatiisiibwa omo luholho lhwa kristo kyikamiinyisaya kyi?
23. Omundu akingira athi omo kathi ka Kristo?
24. Kyinathkekkene omundu eryibiikwa busana n'ekyilhubirwa ekyithere? Byamabya iko biri bithya, akatholera inyakolha kyi?
25. Olhubatiiso lhukalhamaya mughulhu wahi?
26. Amatsiko w'omukama n'erilhubukiibwa liwe bikakanganyibawa bithi, omo kyutsutsu ky'omukonga w'eribatisiibwa?

Eky'eryigha 10

Emighisa y'engulhu mbuya

Emiibiiri y'Engulhu Yowene yitheko, n'erilhayira ly'engulhu mbuya, hali nibya emighisa y'engulhu mbuya. Ni kwenene, esyanzumwa nisyeryikiiriirya, erolhayira niryeryolhobera, n'emighisa niyeryangirira okwabo abikikiirirya n'eriliigha engulhu mbuya. Omukwenda Paulo akabuugha athi, *“Thupipe*

Nyamuhanga Thatha w'omukama wethu Yesu Krosto! Busana n'erimathikana na Kristo Nyamuhanga abirithuha omuyiisa munene. Abithuha obuli muyisa w'ekyirimu owakalhuuwa omo mwanya y'elhubulha" (Efeso 1:3). Kandi akasakangira ko banyikiyawe Abaroma, "Nyinasi omughulhu nasyahika ewenyu, nasyasa n'omuyisa wosi owa Kristo" (Baroma 15:29). Emighuma oko miyisa ni yahi? Ni mingyi, thukendithonda emighuma yoko yihangene kutsibu ahikwa:

1. Omwilhobera Engulhu Yoweneya Kristo omundu akathunga erisangulhwa kw'ebibi byiwe. "Petero mwabwirabo athi, Mubindule emithima yenyu, muleke ebibi, kandi obuli mundu abatisibawe omo liina lya Yesu Kristo busana n'eribuyirwa ly'ebibi byenyu, neryo mwasyabana olhuusuunzo lhwa Nyamuhanga yo Omuliimu Abuyirire" (Emiibiiri 2:38). Oyu nimusindo oghundi ow'eribuugha ambu omundu akalhamibawa (Mariko 16:16), kandi kw'abibuthwa kandi (Yoane 3:5). Ni kyeriswkya bungahi omundu eriminyanya ngoko ebibi byiwe byabimulhusiibwako kandi ngoko hathya ni mundu muhya-muhya oyuyitheka-thehire eritsuuka engebe yiwe y'obuhya-buhya.

2. Erilhaba omo ngulhu mbuya omundu akingira omo Kristo. "Simwasi kehi? Ithwebosi ngoko thwabatisibawa erimatikana na Kristo ithwabiribatiisiibwa erimathikana n'olhuholho lwiwe kwehi?" (Baroma 6:3). "Kusangwa busana n'eryikiiriirya, enywebosi muli ban aba Nyamuhanga busana n'rimathikana na Kristo Yesu. Kusangwa inywabosi mwabatisiibawa erimathikana na Kristo yesu mwabiryambalha emibere ya Kristo". (Galatia 3:26,27). "Kusangwa omundu amabya amathikene na Kristo, ni mundu muhya-muhya; emyatsi yakera yabirirenga, neryo emyatsi mihya-mihya yabirihika" (2 Korinto 5:17).

3. Omwikirirya engulhu mbuya thukingira omo mubiiri wa Kristo, kutse ekanisa. Omo 1 Korinto 12 Omukwenda Paulo akaghaniraya omo buli, oko mubiiri wa Kristo, ni kwenene thwabiribwirwa ngoko omubiri y'ekanisa (Kolosai 1:18; Efeso 1:22,23). Neryo akathondogholha athi ly'eribatisiibwa neryo ithwingira omo mubiri kutse ekanisa "*Kandi momwaganzwa ng'abake oko wandi makanisa kwehi? Omo kyughuma kisa eky'erithendibanuubya busana nobwagha byaghe. Mondakolha ndeke, munyibuyire*" (1 Korinto 12:13). Ekanisa kyo kthunga ekyinene omo kyihugho ekyosi. Siyangatheribwa niikwa yikesyimana kera na kera. Nikyeriswekyia eribya omughuma woko kyithunga ekyi, eribya bikiriirya bomo Kanisa yomukama.

4. Lithya thuli ban aba Nyamuhanga, nokweryo, abikiriirya. "*Niikwa omundu amaghalhwa kusangwa ni Mukristo, syakwe esisoni, niikwa apipe Nyamuhanga busana neribya Mukristo*" (1 Petero 4:16). Busana nakyi? Kusangwa omo lina Iya Yesu muli omulhamo. "Neryo erilhama siriri omo ghundi mundu, kusangwa Nyamuhanga syalithahulha erindirina omo kyihugho kyosi omukathi-kathi kab'abandu, eryangathuulhamya" (Emiibiiri 4:12). Thalengakania kukyo! Omwikirirya Kristo n'eryolhobera erikangirirya liwe, akathusikaya inyathiwikirirya eryambalha erina liwe. Oyu nimughisa munene okwekyi kyisa.

5. Ithwe ng'aKristo thuli omo mwanya w'eriramyia omukama. "*Niikwa omughulhu akasa, kandi lino ane, abaramya bekwenene basyaramya Thatha omo kyirimu nekwenene, kusangwa Thatha akasondaya abandu abli bathya eribya baramya biwe. Nyamuhanga ni muliimu, nabaka muramaya litholere ibamuramyia omo kyirimu n'omo kwenene*" (Yoane

4:23,240. Thukakungawa erithendileka erihindana lyethu haghuma. “*Sithuleke erihindana lyethu haghuma, ng'emibere y'abandi bandu, niikwa tusikanaye. Kandi thuyitsinge omw'ebyo, omughulhu thukalhangira ekyiro ky'omukama kyikahika hakuuhi*” (Hebrania 10:25). Ni mughisa munene n'risikibwa thukabya ithukahindana n'bandu b'omukama ok'obuli kyiroy ekyikatsuuka eyenga thuramyama omukama. Ekyi sithutholere thukaganzakyo mulhwakwamirwa, kutse ng'omubiri, niikwa ng'omughisa. Omukama iyuwene-wene ebirithulhagha erisyabya mugheni mukulhu, nikwenene sithwanze erimukukubalya. Mwabuugha iyuwene-wene athi, “*Kusangwa ahobandu babiri kutse basathu bahindene omo lina lyaghe, nyineho omo kathi-kathi kabo*” (Matayo 18:20).

6. Hali omughisa w'erihindana. “*Neryo mubasiba bakigha erikangirirya n'eribya bughuma nabo. Kandi babya bakahika oko mez y'omukama n'kwisaba*” (Emiibiiri 2:42). Ithwe ngabakristo thukayitsuutsa erihiranamo omuuhwa, okyi ni nzumwa nguma okwihindana obuli yenga. Obughuma obukalhwa omwihindana, eriramyama n'omubiiri akabya mughisa iwowene-wene.

7. Thukathunga omughisa w'eririsaba. Nyamuhanga syahulikirira obuli mundu. Amasako akabuugha athi, “*Tunasi Nyamuhanga syalyowa abakolha-nabi; niikwa omundu amabya akakenga Nyamuhanga, nerikolya eby'anzire Nyamuhanga akamwowa*” (Yoane 9:31). Omo mwatsi eyindi, erisaba lihewirwe busana n'abana ba Nyamuhanga, omundu oyuwangahika oko Nyamuhanga ng'athatha wiwe. Nomokyine kyithya, ne'risaba ly'omwikirirya likatholera

iryabya irine omwisonda lya Nyamuhanga imolyowa n'erisaba liwe erisubwamo. *“Neryo kusangwa thunasi kwakathowa, thunasi ngoko akathuha ebyo thukamubulhaya”* (1 Yoane 5:14). Niikwa wamaghenda oko musakyi mu Hebrania akabuugha athi, *“Neryo thuyithwale hakuhi n'obwiranda oko kyithumbi ky'obwami kya Nyamuhanga, ahali olhukogho. Thuthoke eribana erighanyira, kandi thwangirire olhukogho lhw'eriithuwathikya oko mughulhu w'obwagha”* (Hebrania 4:16). Hano alyakanganaya oko mughisa ow'amaka ow'erisaba. Nisiima lingahi eryothukatholera ithwasiima kusangwa n'omo thwangabya ithuli omo bwagha bungahi, obuliitho, kutse hwamabya ithuwithe obwagha bw'erisaba n'Nyamuhanga habya kyindu kyahi, thwangana muthwalira kyo ithunasi thuthi, ithwe ngabana biwe thwangana mukanirya kandi thuthi akendithuyirira olhukogho n'eriminyanya neryo inyakolha okwisaba lyethu ngoko thulyamusaba.

8.Thuwithe omughisa ow'erimwibuka obuli kyiro ekyikatsuuka eyenga omughulhu thukalya oko meza. Paulo akakanaya kukyo kwatya, *“Olhuthehi olho lhw'omughisa, thukaha ewasiingya busana nalho. Olhuthehi olho, silhw'erisangira omo musasi wa Kristo kwehi?”* (1 Korinto 10:16). Nikwenene, niky'omughisa kinya mulimu eri erihindana noyo oyuwathuholera thukibuka omubiri wiwe n'omusasi wiwe neryo thukasika busana n'erikolha thuthya.

9.Erilhobera Engulhu Yowene ya Kristo, thwabiryangirira Omulimu Abuyirire. Thwamaghenda kandi omo Emiibiiri y'abawenda 2:38, Petero akabuugha athi erilhaba omwiyisubamo n'mwibatisiibwa, thukathunga erisangulhwa

ly'ebibi byethu hayiima n'olhusuunzo lhw'omulimu Abuyirire. Erithunga Nyamuhanga, Kristo, n'omuliimu abuyirire ibanikere omwithwe, ni mughisa owathawithe eky'erilingirirania nakyo. Ni kyitsumbi kyahi ekyothwangathunga ekyirengire okw'ekyi?

10. Mukabya n'omughisa ow'eribyaho busana n'omukama, erimwimanira hano omo kyihugho. *“N'ebiyosi mukakolha, omo kyinywa, kutse omo muubiiri, mukole ebyosi omo liina ly'omukama Yessu, imunemuha ewasiingya oko Thatha Nymuhanga busana na Yesu”* (Kolosai 3:17). Kristo iyuwene-wene mwabuugha athi, *“Niikwa mutsuuke erisonda obwami bwa Nyamuhanga n'erithunganene riwe, nayo asyabaha ebindi byosi ebi”* (Matayo 6:33).

11. Thuwithe etseme y'erikangirirya abandi enzira y'omukama n'eriminya thuthi omukama akesyabya nethu emighulhu eyosi. Thwangabya ba mughisa mungahi ogho thuwithire abandi, noko kyihugho nibya, thuthatha bakangirirya okwenene n'eribindulhabo bakasa oko Kristo? Isi ebi bisa, thukabwirawa bungahi omughulhu thukalyathanga thukakolha erisonda ly'omukama ngoko abirithulhagha erisabya nethu omughulhu oghosi. Niikwa mumuhulikire, *“Neryo mughende, muyire abigha oko bihanda byosi; mubatisayebo omo liina lya Ise, n'ery'Omughalha n'ery'Omulimu Abuyirire. Mukangirirayebo bakole ebyosi ebyo nabiribahana. Kandi mwibuke! Ingye ko ndi haghumanenyu erihika okw'ihwere-rera ly'emighulhu”* (Matayo 28:19,20).

12. Erighinzerera, omukama abilhagha erithuha embiitha y'engebe, kutse engebe y'erikotha, thwamakolha ebihano byiwe

n'eryikalha ithune bayiketherwa embere syiwe. “*Obutseme buli okwabo abakeraya esyokanzu syabo ibathoka eribya n'ehamuli oko muthi w'engebe, n'ehamuli y'erilhaba omo syongyo sy'omuuyi oyo*” (Eribisuulirwa 22:14). “*Ubye n'obuthaleghulha erihika oko luhulho, naghe nasyakuha embiita y'engebe*” (Eribisuulirwa 2:10).

Lithya oyukabuugha athi omukama syalileghana ebikamuhikako nindi? Oyukabuugha athi engebe y'obukristo si ngebe yabutseme nindi? Oyukabuugha athi engebe y'obukristo siyiwithe ebyo yikaha nindi? Oyukabuugha athi engebe y'obukristo siyiwithe maha nindi? Engebe y'obukristo yongebe eyirengire esindi, engebe eyikaghaba, iy'omundu akatholera eribyamo. Busana nekyo, omundu niwabwiranda erilhwa oko kyibi, neryo thunga engebe Yowene kandi ey'obuhulho, kandi iyinawithe ebyosi ebitholere omundu n'eyakasonda. Akatsumulhawa omo bindu n'omo mulimu. Ebyo ebi abitsuka akikirirya engulhu Eyiwene. Neryo aho y'enzuuko y'engebe yiwe. Hano hw'emighisa eyithehwayo yitsuukire.

Ebibuulyo

1. Ni wahi oy'omukama akasonda inyathunga emighisa y'Engulhu Eyiwene?
2. Soma Efeso 1:3 wanaghanirya kukyo.
3. Omundu akahebawa kyi omwikirirya Engulhu Eyiwene?
4. Omundu akingira omo Kristo mwathi?
5. Hereraya emilhondo eyikakwamana n'ekyi.
6. Emighisa y'omo masako yiri hayi?
7. Omundu akingira athi omo Kanisa?

8. Thonda omubiri wa Kristo nga wahi?
9. Ekyithunga ekyirengire ebindi ni kyahi omo Kyihugho? Busana naki?
10. Thonda ebiri omo 1 Petero 4:16.
11. Oomulhamo akabanika omo liina lyandi?
12. Omukama akasonda ndi erimuramya?
13. Busana naki thukakungawa erithendileka erihindana?
14. Nindi oyuli mugheni mukulhu ok'obuli hindana okwiramya?
15. Tonda eriyitsutsa ly'erihindana.
16. Omukama akanahulikirira erisaba ly'omuubiihya?
17. Nindi oyutholere erisabwa?
18. Thukasaba bungahi?
19. Hreraya ekyilhubirirwa ekyiri omo meza y'omukama.
20. Ni luhembo lhwahi olhw'obuli mukristo akathunga?
21. Nindi oyutholerwa eribya w'erimbere omo ngbe syethu?
22. Ni mo musindo wahi oghothuwithe erithoka erikangirirya abandi?
23. Ni bahi ab'omukama akendisya embiitha y'erikotha?
24. Eribya mukristo kyinawithe ndundi?

Eky'eryigha 11

Erikangirirya Engulhu Yowene

Kristo mwabuugha athi, “*Neryo mughende, muyire abigha oko bihanda byosi; mubatisayebo omo liina lya Ise, n'ery'Omughalha n'ery'Omulimu Abuyirire. Mukangirirayebo*”

bakole ebyosi ebyo nabiribahana. Kandi mwibuke! Ingye ko ndi haghumanenyu erihika okw'ihwere-rera lyemighulhu" Matayo 28:19,20). Mwabuugha athi, "*Neryo yesu mwabwirabo athi, Muye omo kyihugho kyosi muthulhughanaye Engulhu Yowene oku bandu bosu, Oyukikiriraya kandi inabiribatiisiibwa asyalhamiibwa; niikwa oyuthi kiriraya asyasingwa*" (Mariko 16:15,16).

Omo nzumwa esi, thukanza erisamalira ebindu bingyi ahikwa:

1. Yesu mwalhaghira abakwenda erighenda. Omukama mwababiwira erighenda lisa, niikwa mwababwira athi baghende omo kyihugo kyosi, okobuli kyihanda nokobuli kyihangwikwa ky'omo kyihugho. Omo mwabya obuli mundu, isihali oyukalhabibawa kw'ameso. N'omokyiro ekyo lhwabya lhumimbi, wamasamalira ngoko habya sihali ngumbaghali n'erihururu ehikalhabako omwatsi ebyo thuwithe omo mughulhu ono, nomokyine kyithya, eri lyabya ilhaghira ly'omukama, nimkwenene syangabasabire ekyithethokekana.

2. Yesu mwalhaghira abigha eriyakangiririya. Omwikangairabo erithuulhagho, mwababwira nibya ebikayathuulha. Mwabuugha athi Engulhu Yowene yikatholera eyathuulhwa, kandi n'erilhangira bathi sihalibya eminya omwatso oyu wonabi, mwathondekaniagho, athi, "*Oyukikiriraya kandi inabiribatiisiibwa asyalhamiibwa; niikwa oyuthi kiriraya asyasingwa*" (Mariko 16:16).

3. Yesu mwabuugha athi abigha basyabatisaya abakendisyaliiha

Engulhu Yowene. Erimbere thukatholera ithwaminya ngoko Kristo mwahira olhukwamirwa lhw'oko bigha erithwalha Engulhu Yowene y'omo kyihugho. Omolhukwamirwa olho simwabya erilhangira bathi abandu bakiriraya Engulhu Yowene, kutse omwatsi omunene oghundi, niikwa babya barilhangira bathi Engulhu Yowene yikahka ok'obuli mundu. Nomokyine kyithya, Engulhu yabere yabirithuulhwa kandi ihamabiribya abandu abakasonda eririghayo, neryo omukama bwabuugha athi babatisayebo. Neryo mwalholya embere akababwira omusindo ogho bakendibatisyabomo. Mwabuugha athi, *“Ubatisayebo omo liina lya Thatha, n'eryo mughlha n'eryomuliimu Abuyirire”* (Matayo 28:19). Kandi, omukama mwathanza hakabya erithendiminya ndeke erilhaghira eri.

4. Okwighunzerera, Yesu mwakabirirya athi abo abairiolhobera Engulhu Yowene baswa-kangiriribawa ndeke. Kandi, ghuminye nok lyabya ilhaghira ly'omukama athi baghende omo kyihugho, bakangiririaye Engulhu Yowene oko bosu, n'eribatisya abakendyanza eryolhobera erilhaghira eryo. Niikwa ekyo kyamabirikolhwa, neryo muhabya olhundi lhukwamirwa, erilhwa omo biinywa bya Yesu, *“Mukangirirayebo bakole ebyosi ebyo nabiribahana. Kandi mwibuke! Ingye ko ndi haghumanenyu erihika okw'ihwere-rera ly'emighulhu”* (Matayo 28:20). Ekyi kyikaminyisaya kyithi omukama mwakolha ekyosi ektathoka eribughaho eriminye nabi omwatsi oyo. Mwatheka-theka athi abatsuuka eryikirirya esyo nzumwa esyikatsuka omeatsi w'engulhu Yowene sibalekawe basyholha kyinyamuliimu, niikwa baswa-kangiriribawa n'erihabulhwa omo nzira y'ebibya omo ngebe y'obukristo. Omo nzira eyi syakanganaya erilhama lyabu ly'akathambi kake, niikwa n'obusana bw'esyangebe

syabu sy'erilhama kera na kera. Asonda bathekathekawa eribya nesyanagebe sy'obuyiketherwa bw'obukristo, neryo kyangathokekana erilhaba omwithaswa-kangiriribwa.

Ebiri embere biakakanibawako ng'erilhaghira erikulhu ery'erilhaghira eriyathuulha Engulgu Yowene lirimo ekyihugho kyosi n'omwatsi ni mukulhu kandi owamaka manene busana n'erilhama ly'emyoyo. Erilholya embere, thukanza erilebya ngoko omukama athekatheka obukwenda obu erikolhwa. Thwamalebya omo Emiibiiri y'abakwenda 1:8, thuaksanga endekatheka y'omukama iyiyithokire omo bihande ky'ekyihugho. Hulikirira erilhaghira liwe akathuma abakwenda: *"Niikwa mwasyabana obuthokyi omughulhu Omulimu Abuyirire asyabahikako. Kandi masyabya bathuliri b'omwatsi waghe eYerusalemua nomo Yudea yosi, n'eSamaria, ne'erihika oko nduuli-nduuli sy'ekyihugho"* (Emiibiiri 1:8). Thukasoma ekitabu kya Emiibiiri y'abakwenda thuasangana kwenene kubyanabya byabere bithya. Thuthasyasamalirira hakuhi.

1. Engulhu Yoweneyabyay'eritsuuka eYerusalem. Thwamasoma Emiibiiri y'abakwenda 1 na 2 thuaksangayo binu: abakwenda bali Yerusalem, ekyiro kye Pentekote kyamahika abayuda ibabirhindana erilhwa omo kyihugho kyosi. Neryo omulimu abuyirire amothuulhirwa oko bakwenda, eribathokesya erikania emibuughe y'ababyaho, eyo yendambi batsuukiramo erithuulha Engulhu Yowene. Ekyabya kyalwhire omo, abandu 3000 mubasiima bakathwamo eryikirirya Ekyiinywa bamabatisiibwa n'erithomekwa oko Kanisa. Erilhwa omughulhu oyo Engulhu Yowene muyatsuuka erithuulhuughaniibwa.

Kyinganakanganiibwa ngoko omo munge gh'omukama aw'erikiririya Engulhu erithuulhughaniibwa oko ndambi eyi, abandu bangyi ibabirihindana erilhwa omo kyohugho kyosi, thuthi kyamiinyiisaya abangyi abikiririraya omukama, engulhu muyatsuuka erithuulhughaniibwa omo bihugho byabu bakasubayo eriyabwira abandu babo omwatsi oyu. Ekyerileberyako, mukasoma oko b'ebihanda erilhwa eRoma ngoko banabyaho. Neryo linyuuma ithyowa ekanisa iyabiri tsuuka eRoma kandi Paulo isyalyalhambayir'ayo, kandi namasako syaliathabuugha ahi Petero mwalhambayir'ayo kutse eribya abandi bakwenda ibaya ibabirilhambayir'ayo. Omwatsi oyu athikiyi? Obwimiri, ab'ebihanda abalhwa eRoma mubikiiriirya Engulhu Yowene, mubasub'eka, bamakangiriirya abandu babo, neryo ekanisa kuyatsuuka yithya.

2. Engulhu Yowene yabya y'erikangiriirya omo Yudea yosi. Yesu abya omo manya oyo sesene hakuuhi n'eYerusalema. Ekyo kyikamiinyiisaya ngoko sihabya bulitho okwikangiriirya oko bandu bahakuuhi naho. Neryo omo biro ebyakwama oko, engulhu Yowene muyathuulhuughaniibwa omo eYerusalema n'eYudea eyosi. Neryo thukasoma oko lhuholho lhwa Stefano, "Neryo Saulo akasondaya akaliigha olhuholho lhwiwe. Oko kyiro ekyo, eryendererya linene mulyatsuuka busana nekanisa eYerusalema. Kandi abandu bosu bekanisa mubapanzikana omo bihugho bye Yudea ne Samaria, abakwenda isibali kubo" (Emiibiiri 8:1). Erilholya embere, thukasoma okwabo abapanzikana, "*Neryo abapanzikana mubaya eyi n'eyi bakathuulha Engulhu Yowene*" (Emiibiiri 8:4). Neryo Engulhu Yowene muyathuulhuughaniibwa omo Yodea yosi.

3. Neryo Engulhu Yowene muyabya y'erithwalhwa eSamaria.

“Filipo naye mwandaghalira oko uuyi w’eSamaria, neryo mwakangiriry’abo Kristo. Neryo esyondeko syako mubathegha mwathwi wab oko byo Filipo abuuha. Abosi mubahulikirira, n’erilhangira ebithiko-thiko ebyo akolha” (Emiibiiri 8:5,6). *“Niikwa omughulhu bikiriiraya erithuulhuughania lya Firipo ly’ Engulhu Yowene yobwami bwa Nyamuhanga, n’eyeriina lya Yesu Kristo, mubabatisiibwa, abalhume n’abakali”* (Emiibiiri 8:12). Linyuuma Petero bana Yuhana babere babirilendera nabo, ebisakirwe bikabuugha bithi, *“Neryo Petero na Yoane babere babirithuulha omwatsi w’ondeke, n’eribuugha ekyiinywa kyonukama, mubatsuuka erisuba eYerusalem, neryo omo nzira mubathuulha Engulhu Yowene omo hiyii hingyi ehyanya Samaria”*(Emiibiiri 8:25). Neryo Samaria muyathunga Engulhu Yowene, erikwamana n’endeka-theka y’omukama.

4. Erighunzerera, Engulhu Yowene yabya y’erithuulhwa omo kyihugho kyosi. Eriminya ngoko muya-thuulhughaniibwa omo kyihugho kyosi, Paulo akabuugha athi, *“Kwenene mwamalholya embere n’eryikirirya, emunasikire n’ekwenene kandi simwangathengethengeriibwa erilhwa oko Engulhu Yowene eyo mwowa, eyakangiriiribawa ok’obuli kihangikwa ahisi sy’ekyanya, eyo, ingye Paulo, nakangiriraya”* (Kolosai 1:23). Ko bithya endekatheka y’omukama ey’erithuulhuughania Engulhu Yowene kuyabererera yithya omo mughulhu w’emyaka asathu nibiiri.

Omukama akasonda thukole thuthi omughulhu ono? Angasonda ithwakolha ikwane ekyighuma. Eribuugha ambu, nethu thuwothe olhukwamirwa olw’erithwalha Engulhu Yowene y’omo kyihugho kyosi, ok’obuli ihanga ly’omo

kyihugho kyosi, ok'obuli kyihangikwa ky'omo kyihugho kyosi. Thuwthe omubiri munene wamasamalira ngoko hathya muli bandu banene, niikwa thwamasamalira eby'erikolesya ebiri ok'obuthuku munabwire embere syethu, ng'esyongumbaghali, n'ebindi, omubiri wethu akabya ini mwolho. Niikwa omukama abitheka olhukwamirwa embere syethu kandi thukatholera ithwakolha. Kandi, syathuthuma erikolha ekyithekyangathokekana.

Ekyihugho kyikayistuaka Engulhu Yowene ya Kristo. Yo maha w'ekyihugho. Kiyo nyisa eyanga kyibindulha, muwathikay'ekyo, nerkyilhamya. Ithwe abawithe oko Ngulhu Yowene n'ilhangira thuthi yikahika omo kyihugho kyosi.

Ebibuulyo

1. Sma Matayo 28:19,20 na Mariko 16:15 wanaghanirya kubyo.
2. Ni bayo ab'omukama alhaghira erighenda?
3. Abuugha thi baghende hayi?
4. Omukwama mwabasaba ekyithethokekana?
5. Mwabathuma eriyakangirirya bihi?
6. Abigha babya be'ribatisya bahi?
7. Babya be'ribatisiibwa omo liina lyandi?
8. Abigha babya berikangirirya bihi okwabo ababya ibabiribatisiibwa?
9. Busana nakyi, Matayo 28:19,20 na Mariko 16:15 byahulhwamo obukwenda obukulhu?
10. Thonda ebiri omo Emiibiiri 1:8.
11. Thonda emikwikire y'erikyihugho ekyosi ngoko

bangathuliramo Engulhu Yowene.

12. Engulhu Yowene yabya y'eristuuka erithuulirwa hayi?
13. Ganiraya omo Emiibiiri y'Abakwenda 2, neryo muhabya kyi?
14. Mukyathokekana kyithi Engulhu Yowene eritsuuka erithuulhughaniibwa erilhwa oko nzuuko?
15. Ekyathokesaya Engulhu Yowene erithwalhwa omo Yodea yosi ni kyahi?
16. Nindi oyuwathwalha Engulhu Yowene omo Samaria?
17. Engulhu Yowene yine yathathwalhwa omo kyihugho kyosi?
18. Omubiiri wethu ni wahi munabwire?
19. Thwangana kolh'agho?
20. Thonda eby'erikolesya okwithulhughania engulhu munabwire ebiri hakuuhi nethu.
21. Ekyihugho kyinakwire obwagha bw'Engulhu Yowene

Eky'eryigha 12

Erikangirirya esindi Ngulhu

Endaghano Nyihya-nyihya yikakakamiriraya erituulha engulhu Yowene nguma eya Yesu Kristo, nomokyine kyithya yikanakanaya oko sindi Ngulhu Syowene. Paulo mwakunga athya, “abandu abo ni bakwenda b'amabehi abakatheba, bakayisosekanaya ng'abakwenda ba Kristo. Oyu simwatsi w'eriswkerwa, kusangwa Sitani nayo yikayisosekanaya ng'omulaika w'ekyakakalha. Neryo simwatsi akalire busana

n'abaghombe bayo, bamayisosekania ng'abaghombe berithunganene. Niikwa oko nduuli basyahembwa ng'Emiibiiri yabo ko yiri" (2Korinto 11:13,1-15).

Paulo mwasakira Abagalatia athi, "Ngabaswekera! Kusangwa mukathogha lhuuba okw'oyo wababirikira omo lhukogho lhwa Kristo, imukakwama eyindi ngulhu, niikwa hali abandi bakabatsenga-tsegaya, iabkasonda eribindulh'ayo nabi Engulhu Yowene. Niikwa ithwe, kutse omulaika oyukalhuua elubulha, amabathulira engulhu eyithe eyo thwabathuulira, athakirawe! Ngoko thwamabiribuugha, na lino ngabuugha kandi nyithi, Omundu amabathuulira engulhu eyithe eyo mwangirira, athakirawe" (Galatia 1:6-9). Omukwenda akabuugha athikiy hanu? Thuthalebya ebiri ahikwa:

1. Abagalatia babya ibabiryangirira Engulhu Yowene ya Kristo engulhu hene-hene.
2. Paulo mwasweka akaminyanga ngoko babiribindukira lhuba oko yindi ngulhu. Nomo kyine kyithya, lhuba akathonda athi siyindi ngulhu omo mibere ey'eribya ngulhu y'okwenene.
3. Mumwabanika omwibo abandi ababya ibanganasigha kutse eribindulha Engulhu Yowene eya Kristo ekyangaleka eyabya buyira.
4. Paulo akayighanziramubo akabuugha athi, niikwa iyo n'abandi, kutse n'mwangabya omulaika erilhwa elubulha, amakangirirya eyindi ngulhu omwibo, yithe eyo eyabya iyabirithuulirwa, ibakendisyaabya bathakirwa na Nyamuhanga. Ekyi kyikaminyisaya kyithi Engulhu ey'okwenene yabya iyabirithuulhwa neryo ekyindi eyangathuulirwa iyinemughania eyo siyangabya Ngulhu hene-hene. Akathasya buugha, isikyikulhu oyuwangalet'h'ayo n'omwangabya ini

ndi, erilhwa elubulha kutse oko kyihugho, isyalilengekanaya mundu ndi erikangirirya kyindu kyihya-kyihya kandi akabya inyanawithe emighisa, kusangwa emitsumo erilhwa ewa Nyamuhanga yikasira omundu oyuwangakolha athya. Busana nakyi? Kusangwa Omukama syalithaha omundu obuthokyi obw'erikangirirya ngulhu yindi. Erithuulira yindi ngulhu kyikamiinyisaya ambu eya Kristo yabirithekwa luhandi.

Ahathe erisamalira, erithendileghana, ithwebosi thunasi ngoko hali ngulhu nyingyi esikathuulhawa omo kyihugho munabwirwe. Esyiondekatheka nyingyi esy'erilhamya omundu, isisi hambene, n'ebindi, binemuthuuliirwa. Engulhu y'okwenene ni yahi? Thwanga minya thuthi kothuwithe eyihikire? Thwalha erihabulha eriri ahikwa:

1. Thusube oko Biblia busana n'okwenene okuhambire oko Ngulhu Yowene. Ekyitabu kya Nyamuhanga nikyo nguunuunuuko y'okwenene okwosi okuhambire oko Ngulhu Yowene eya Kristo. Omo mbapura syamu ukendisoma ebikulhu-bikulhu eby' Engulhu Yowene (1 Korinto 15:1-4), n'ebilhayiro by'Engulhu Yowene (Mariko 16:15,16; Emiibiiri 2:38). Erihangya-hangya lyenyu inywebosi, ebyo muthekenga, n'ebiibuulyo byanganasubwamo, mwamaliighira Nyamuhanga akabuugha nenyu erilhaba omo kyiiywa kyiwe.

2. Mughane erikangirirya lyosi erihambire oko ndekatheka y'omulhamo eyikaghanaya ebiri omo masako. Omundu syali athahebwa obuthokyi erihiraho obulengekania bwiwe n'amenge oko ky'eryigha ekyi, kandi kwenene sihali mundu oyukalengekanaya oyuwangabyikirirya.

3. Esyangulhu esikakangiriribawa n'abakangirirya b'ebisomo sisyangabya Ngulhu Yowene eyokwenene eyiri omo Biblia. Eryolhobera Engulhu Yowene ya Kristo sikyendikuthwalha omo bisomo kandi sibyendileka ghukambalha erina erikolirwe n'amundu kutse ekyitsumbi. Ekyo mukyiminye. Liriryo, ebikalhuua omwolhobera Engulhu Yowene ya Kristo ly'erilhamiibwa lyaghu hayiima n'erithomekerwa oko Kanisa y'omukama, busana nekyo neryo iwabya Mukristo kyisa. Soma Emiibiiri 2:38,47); Emiibiiri 11:26).

4. Muyitheghaye okwabo abakakangiriraya bathi, "eryikirirya lisa", bathi omundu anganalamiibwa isyathabatisiibwa, n'ebindi. Ebi by'ebyeryigha ebyo banzire abakakangiriraya esindi ngulhu, isiyo eyithukasoma omo Biblia. Erihabulha eri likahabawa kusangwa Biblia yikakangiriraya yithi omundu erilhamiibwa syal'ikiriraya lisa niikwa akatholera eribatisiibawa nalyo (Mariko 16:16).

5. Mukyiminye muthi abangyi bali oko nzira eyighalihire eyikathwalha omwithoghotha (Matayo 7:13,14). Omughulhu akanahika abakangiriraya eyindingulhu ibabwira abo bakatheba, bathi kusangwa abanene kubakikiriraya bathya. Ukatholera iwaminyanya ngoko abanene sikyiriminyiasaya ambu bobakabya oko kwenene.

6. Esyangulhu nyihya-nyihya esy'omughulhu ono, esikangiriiribawa munabwiwe sikaleta erighabulhamo. Oko luhandi olhundi, Engulhu Yowene ya Yesu Kristo, yikaleta obughuma, n'obuholho. Soma 1 Korinto 1, na 1 Korinto 12.

Wanathasya soma Yoane 17 ngoko omukama asaba athi abigha basyabya bughuma, kandi n'abosi abasyikyirirya erikangirirya lyabu nabo basyabya bughuma.

7. Erighunzerera, wibuke ghuthi esyongulhu esindi esi sisiri-lhamaya. Sikakolhaya abakakangirirayasyo nabakabikirirayasyo b'okwihera. Engulhu enzongole nyisa eya Kristo y'eyiwithe obuthokyi obw'erilhamya (Baroma 1:16,17).

Erilhaba omwithuulira n'erikangirirya ebithere mwomukalhya erighabana. Nokwero, Paulo akahabulha a thi, *“Baliikyetu, ngabalemba-lemba, muyithegaye busana n'abo abakaleta erigabana, n'emyatsi y'eritwiikalya, abatekwama eriikangiiriirya eryo mwakangiiriiribawa. Musaghebo.”* (Baroma 16:17,18). Erikwamanane kyithukatholera ithwaminyerera abathuuliriaba neryo ithwayihengeka kubo. Yoane mwasakanga athi, *“Niikwa oyutesiba omw'ikangiiriirya lya Kristo, niikwa akathomeka kulyo kw'ebindi, omundu oyo siamatikene na Nyamuhanga. Niikwa oyukasiba omw'ikangiiriirya lya Kristo, omundu oyuu amathikene na thatha hayiima n'omugalha. Omundu amabahiikako, athiletha erikangiiriirya eri, siimuumuukokaye omo nyuumba yenyuu, kutse simumuhe obuholo. Kusangwa oyuuukamuukeraya iniamasangira oko miibiirii yiwe mibi.”* (2Yoane 9-11). Neryo Kristo mwahabulha athi, *“Ingye Yoane, ngabwira abosii abakowa ebiinywa by'eriminyerera ly'ekitabu ekii nyiti, omundu amatomeka kubyo kw'ebindi, Nyamuhanga asyamutomeka kwamaliige awasakiire omo kitabu ekii. Kandi omundu amaluuusya oko biinywa by'ekitabu ky'eriminyerera erii, Nyamuhanga asyalhuusya ekyihandi kyiwe oko muthi wengebe, nekhande kiwe oko muuyii abuyiiriire, ebiisakiire*

omo kitabu eki.” (Eriibiisuuliirwa 22:18,19).

Lithya bangyi oko bakakangiriraya eyindi ngulhu nibakwenene omo byo bakakangiriirya. Babirithewwa, niikwa ekyo sikyibalhusayako eribya ibakakangiriraya amabehi n’okweryo bakesyabuliibwa ewa Nyamuhanga busana nekyo bakakolha. Abandi, ibo sibasi kubathe bakenene. Ekyi nikwa kwenene okwabo abakapangisibawa. Syalengene oko myoyo y’abandu, niikwa akakangiriraya ng’enzira y’erithungiramo obukuliro. Syaleghene oko byakakangiriraya, ekyikulhu ly’erighabana ebihembo by’obuli kwezi. Omo nzira yahi okwesi, simuthebawe.

Ebisomo bingyi munabwire bikakanaya oko bughuma bw’ebisomo. Nomo ekyi kyiriho, bakayighaba-ghaba obuli mughulhu. Niikwa bamabya omo kwenene banayisuunzire obughuma, bakatholera abosi ibasuba omo Biblia erisuba oko Ngulhu Yowene, neryo obughuma bukendibanika. Kukyanguhire kyithya.

Ebibuulyo

1. Hane esyongulhu syowene esilhabire oko nguma?
2. Soma 2 Korinto 11:4,2; 2 Korinto 11:13-15, na Galatia 1:6-9.
3. Oyuwakangiriraya aba Galatia nindi?
4. Ni yindi ngulhu yahi eyibabya ibabiri kyithiramo?
5. Ekyikendisyabya oko bandu abakangiririraya eyindi ngulhu nikiy?
6. Esindi ngulhu sinemuthuulirwa omughulhu ono?
7. Niyahi kusyo eya Kristo eyokwenene?
8. Ni kyitabu kyahi ekyithulere erighendamo eriminya

Engulhu Yowene ya Kristo?

9. Erikangirirya lyosi-lyosi lyanginamanira okwenene kandi erinemughania amasako?
10. Omundu anaheberwe obuthokyi erihiramo obwiwe bulengekania n'ebyanzire?
11. Kynathokekene abakangirirya b'ebisomo erithuulhughania Engulhu Yowene y'okwenene ya Kristo?
12. Erilhobera Engulhu Yowene ya y'omukama kyikanahira omundu y'omo kysisomo?
13. Omwolhobera Engulhu Yowene y'eBiblia mukendisyalhwa bihi?
14. Ni bahi abakakangiriraya "eryikirirya lisa"?
15. Abangyi bakalholhaya omo nzira yakyi?
16. Esyangulhu sy'omughulhu ono sikiimanira bihi?
17. Engulhu Yowene ya Kristo yikimbirira bihi?
18. Esindi ngulhu sikanalhamaya?
19. Erighabana-ghabana likasa lithi?
20. Soma Baroma 16:17,18; 2 Yoane 9-11, na Eribisuulirwa 22:18,19.
21. Abakakangiriraya esindi ngulhu ninabakwenene kandi banasi ekyo bakakolha?
22. Kandi abakapangisibawa?
23. Obughuma bwe Biblia bwangaletwa buthi?

Lesson 13

Erikakirya Engulhu Yowene

Erighanirya ambu abo abakakangiriraya Engulhu Yowene bakatholera ibaghendera kuyo, kutse erikwamana, ngoko Paulo aabuugha, “Abandi bamabya n’hamuuli y’eriwatiikiibwa batya, netu situwite ehamuulii eyo kwilababo kwehi? Niikwa itwe motutakola omo hamuulii eyii, kandi tuukayiyiinaya omo myatsi yosi, tuukasyakakiirya Engulhu Yowene ya Kristo.” (1Koriinto 9:12). Nomonabya imwakakirya Engulhu Yowene, mwabya inyanasi ngoko kyananguhire okwiyo kutse oghundi ghosi kwangakolha athya. N’omughulhu ono byanganabya bithya.

Ng’obuli kyiro abakakangiririraya ebithere bakakolha bingyi erikakirya Engulhu Yowene ya Kristo. Thaghanirya ekyi ngakyangasubulira hi kubyabya isibiri bithya. Oko luhandi olhundi, alinga obubi bukakolhawa n’abikiriirya b’kanisa ibobene-bene. Thuthalengekania ngani mibere yahi eyothwangakakiryamo Engulhu Yowene ya Kristo.

1. Thukakakirya Engulhu Yowene ya Kristo omughulhu thukathalhuka erikangiriry’ayo oko bandi. Engulhu Yowene niy’obuli mundu. Niy’erighabana n’abosi. Aho hothusiramo. Omukama abithuthuma erithwalirayo abandi bandu. Mariko 16:15,16). Lithya hali nzira ibiri esykoleramo ekyi. Thwangathuulh’akyo erilhaba omwikania kutse ithakangiriryakyo omuthina thukayithwalhamo embere

syabandu. Abosi bakatholera erikolha ebyosi ebi niikwa abandi sibalikolh'ako n'ekyighuma. Kyikamiinyiisaya kyithi thwamathalhuka erithwalha Engulhu Yowene yoko bandi thukabya ithukakakiraya erighenda embere lyayo. Ekyi ni kyibi.

2.Engulhu Yowene yikakakiribawa omughulhu thukathalhuka erihindana n'abandi. Ekyi kyiri kyithi? Kyanguhire. Thukabya thwamathalhuka erihindana omwiramya ithwebene-bene thukabya isithuthathalhuka eriramya omukama lisa, niikwa thukathalhuka eribana ebyalya by'omulimu ebikathuwathikaya erighenda embere nayo. N'erithomeka oko, thukathalhuka erikangania eky'erilhangirirako ekyitholere embere sy'abandi n'eribana omughisa ow'erihindana inabandi abakasonda erikangiriribwa Engulhu Yowene erilhaba omo buno n'ekyerilhangirirako. Eryo, omuasaki omu Hebrania akabuugha athi, "Tuhambe ndeke amaha wetu ago tuukwamiire, butsira eritika-tika, kusangwa oyo watuula omwatsi oyuu sialiregula. Tuuganiiraye ngoko twangiibuukania oko lwanzo n'emibiiriii Yowene. Situleke eriihindana lyetu haguma, ng'emibere y'abandi bandu, niikwa tuusiikanaye. Kandi tuyitsinge umw'ebyo, omugulu tukalangira ekiro ky'omukama kiikahiika hakuuhii. Twamasimbirira erikwama ebibi omo pono, itwamabiriminya ndeke omwatsi w'ekwene, ko hatakiri buhere busana n'ebibi. Niikwa hali eririndirira omw'iubaha omusango n'omuliro owakaliire, owakandisyabuugha esyonziiguu sya Nyamuhanga." (Abaebrania 10:23-27).

3. Thuakaka-kiraya Engulhu Yowene omughulhu thukathalhuka erikulha-kulhana n'erikulha ng'abakristo. Kusangwa

omughulhu thukaluhirira kinyamulimu thukasonda omundu erithukangirirya omo mwanya w'eribya inithwe thulendikangirirya abandi. Ekyi niky'omusaki omu Hebrania, akabuugha, athi, "*Kusangwa manga-hano inywe mwangabere abakangiiriirya, kwesi mwangaswakangiiriibwa emyatsi y'eriimbere y'ebiinywa bya Nyamuhanga. Mukinatolere amabere butsira akalyo. Kusangwa oyukalya amabere akine mwana, isialiabegera ebiinywa by'eritunganene. Niikwa akalyo ni kabandu bakulu, ababirikola n'eryeghesiibwa omo myatsi mingi, ibabiritoka erisombola ekibuya nekibi.*" (Bahebrania 5:12-14).

4. Thukakakiraya erisonda ly'omukama omughulhu thukathaluka eriyithwalha ngoko thukatholera eribya. Omo musindo oyu thukalettha erihemuka n'erihemulikania erina ly'omukama. Ekyihugho kyikakanaya omunwe ow'erihemulha okwithwe neryo ibabuugha bathi, obukristo bwamabya obw'obu, neryo sinangabya mughuma okwibo. Thekaleka abandu ababuya abayiketherwa ibathwikalha. Thukakanganaya eky'erileberyako ekyithahikire. Ebyosi bikahikahiithanaya. Omukama angasondire isithwahamba buyira erina ly'obukristo, niikwa ithwabya Bakristo ab'okwenene. Akasonda ebyosi ithwabikolha omo liina liwe n'omo lhukengerwa lhwiwe. Muhukirire ngoko Paulo akahabulha, athya, "*N'ebyesi mukakolha, omo kyiinywa, kutse omo mubiiri, mukolebyo omo liina ly'omukama Yesu, imunemuha ewasiingya oko Thatha Nyamuhanga busana na Yesu*" (Kolosai 3:17). Petero akahabulha athi, "*Mwamwatsumwa kusangwa mukakwama Kristo, muli n'omughisa, kusangwa omulimu w'olhukengerwa, w'omuliimu owa Nyamuhanga ow'ikere nenyu. Nikwa sihabye mundu omukathi-kathi kenyu oyukaghalhawa ng'omwithi, kutse*

ng'omurahi, kutse ng'omukoli w'ebibi, kutse ng'oyukayiihiira omo myatsi yabene. Niikwa omundu amaghalhwa kusanga ni Mukristo, syakwe esisoni, niikwa apipe Nyamuhanga busana n'eribya Mukristo. Kusangwa omughulhu w'eritswera abandu ba Nyamuhanga abirihiika. Neryo eritswera eryo lyamatsuuka okwithwe, enduuli y'abandu bathetsomana Engulhu Yowene ya Nyamuhanga yasyabya yithi kwehi? Ngoko amasako akabuugha athi, lyamakalha busana n'omundu uthunganene erilhamiibwa, oyothekenga Nyamuhanga, n'omukolha nabi, basyabya bathi kwehi? Neryo abakaghalhawa busana n'erisonda lya Nyamuhanga bahire emithima yabo omubyalha by'omuhangiki oyuthe reghulha, babye bakakolha ekyithunganene” (1 Pettero 4:14-19).

5.Thwangakakirya omubiiri w'omukama erilhaba omwighalhanghandya omubiiri wethu n'lhukwamirwa lwethu. Hali bikirirya bangyi isibabi kutse eribya n'emitse mibi. Sibali-ghirira erikolha ekyindu ekyibi kutse ekyithere. Abandi bangabuugha abandu abo ni babuya. Niikwa erithalhuka lyabu liri rithi baghenderanya, erithendileghana ebindun bingyi ebibangabere ibakolha. Niikwa omwithendileghana, erithalhuka erikolha, obuthaleghana, n'ebindi niky'omulyambo. Thunasi ngoko ekyi kyikabya omo ngebe y'obuli kyiro. Nomo ngebe ya kyinyamuliimo ko kyine kyithya. Kyikaleka Yakobo inyabuugha, “*Muby bandu abakakolha n'erowa ebiinywa bya Nyamuhanga, bustira abakahulikirira lisa n'eriyitheba*”. (Yakobo 1:22). Kandi soma, Yakobo 2, ebihambire okw'ikirirya, abo abatheghenda n'erikirirya lyabo, na Yakobo 4:17. Okwighunzerera, thukasoma, “*Busana n'omwatsi oyu, litholere ithwatheya ndeke ebyothwabiriowa, thukasyayihengeka thukalhwa oko*

kwenene. Kusangwa ekyiinywa kyabughawa n'abamalaika mukyahangana ndeke, n'obuli ilolho n'erithendiowa mubyasuyirwa ngoko litholere. Nethu thwasyabalha thulthi thwamapona erilhama linene ringaha kwehi? Omukama mwakama mwatsuuka erithuulha engulhu y'erilhama eri, neryo abamowa mubahanganiayo ndeke” (Hebrania 2:1-3).

6. Thwangakakirya Engulhu Yowene thukathalhuka erihithya oko byothukabana. Ekanisa yikimanira okyibyo abikirirya neryo ibahithya imoyathoka erikolha olhukwamirwa lhwayo olhw'eriwathika abali bwagha n'erikangirirya Engulhu Yowene. Niikwa thwamathendi wathikya. Ekyi sikyirimiinyisaya kyithi ekanisa siyendikolha olhukwamirwa lhwayo, kusangwa abandi bakendihithya. Nomokyine kyithya, ekanisa omo mibere eyi yikathalhuka omo mibiiri yayo. Kyireka Biblia iyabuugha yithi omughulhu thukathalhuka erihithya thukabya ithwamiiba Nyamuhanga, kutse ithwamamuhambirira okwikolha. Angakolire bingyi nethu ithulyamuha bingyi erimuthokesya erikolha bingyi. Neryo Paulo mwahabulha athi, *“ok'obuli kyiro ky'eyenga, obuli mundu abike kyihandi ky'enduundi akabana, butsira erilhabya ekyibo ekyiro nasyahika”* (1 Korinto 16:2). Thwibuke thuthi thwamathalhuka eriherya ngoko thukatholera kyangenalhwamo omundu mulebe erithendiowa Engulhu Yowene kutse omundu oyuli bwagha, inyawira. Nokweryo ni mwatsi akalire thwamaminyerera ngoko ni mwatsi w'erilhamya emyoyo, n'eribya ndeke ly'abandu bangyi kyinya-mubiri neyethu myoyo iyinemo.

7. Lithya ukayalhangira ahambere uthi thwanganabya thukatsweba eyo ekanisa yasira, kwilhabirirya ebithuunga

by'ebisomo busana n'erithalhuka lyethu erithendikangirirya Engulhu Yowene omo kyihugho, erithalhuka lingyi likendibanika okwithwe. Ni kwenene ebithuunga by'amakanisa byanganakakirya erithuulhuughana ly'obukristo obw'endaghano Nyihya-nyihya, niikwa isithwibirirawa thuthi omughulhu thukabya ekyo thutholere eribya, n'erikolha eky'omukama asondire ithwakolha, thuthi sihali buthokyi obukalhuua eyihya obwangathukakirya eriberererya erisinda ly'omukama, ekyi mwomuli erithwalha Engulhu Yowene omo kyihugho kyosi. Niikwa omughulhu omunene ebindu ebikathukakiraya bw'obutseke bwethu, ethalhuka lyethu, erikirirya lyethu like, ebibi byethu, n'ekuunze y'ebindi bindu ebyangabya ibiri omo mithima n'omo ngebe syethu.

8. Omukama athuwathikaye erithunga eryikirirya linene, olhwanzo, omuuhwa, erihandabuka n'erihathikana eriyira emyimanire busana n'okwenene, erikolhabyo omo ngebe syethu esy'obuli kyiro n'erithwalha ebyosi ebi omo kyihugho ekhiri okwiholha. Ebi biniaho, thukendiyisanga ithwabiribya kisenge okwikakirya Engulhu Yowene kutse oyukahamiray'ayo. Thwikiriraye thuthi thuli omo mughulhu w'erihwererera ly'emighulhu.

Ebibuulyo

1. Kynathokekene erikakirya Engulhu Yowene?
2. Ni bahi abaghuma boko bakakakiraya Engulhu Yowene ya Kristo?
3. Kynathokekene abaghuma boko bandu aba eribya ini bikirirya?
4. Hakabya kyi thwamathendikangirirya Engulhu Yowene

oko bandi?

5. Nimo nzira ibiri syahi esyothwanga kangirirya mw'abandi?
6. Thuakakiraya thuthi omubiiri wa Nyamuhanga omughulhu thukathendihindana haghuma?
7. Soma Hebrania 10:23-27 wanaghanirya kuyo.
8. Thwamabya batseke kinyamulimu hakatholera ihabya kyi?
9. Abikirirya bakatholera ibayithwalha bathi?
10. Thukakolha kyi omughulhu thukathaluka eriyithwallha ngoko thwangayithere?
11. Kolosai 3:17 hali mwatsi wahi?
12. Soma 1 Petero 4:14-19 wanaghanirya oko mwatsi owaliho.
13. Abikirirya banaithe Emiibiiri n'esyongwamirwa?
14. Yakobo 2, akakangiriraya bihi?
15. Thwasyabalha thuthi thwamaghalhaghandia omulhamo wethu?
16. Nimo nzira syahi esyothukakiray'amo Engulhu Yowene?. Omughulhu thukathalhuka erihithya ngoko thwangahithirye.
17. Thukiba Nyamuhanga y'omughulhu wahi?
Thukamukakiraya mughulhu wahi?
18. 1 Korinto yikakangiriraya kyi?
19. Oyuwangathwikalya ekyilhubirirwa kya Kristo wahi?
20. Omukama asondire bandu b'amusiindo wahi?
